


MGA HEBREOHANON,

KAPITULO SIETE ¹

 . . . gabii, ug ang madungog si Joyce nga nagaawit. Kabalo ba mo nga usa kana ka milagro mismo? Ang maong batang babaye, giunsa kaha niya paghunahuna ang tanan niana? Tungod matag gabii aduna man siya'y bag-ong ginapapaminaw sa atoa. Kung giunsa man niya paghunahuna ang tanan niana, siya'y usa gayud ka maalamon nga bata. Panalanginan sa Ginoo kana nga bata.

² Bueno, ugma, sa alas dos-traynta, sa punerarya sa Charlestown, Indiana. Ang minahal natong, mitaliwan nga igsoon, si Igsoong babayeng Colvin, ato siyang hatagan sa katapusang pagtahod nga mahimo nato para kaniya, didto sa—didto sa punerarya ug sa lubnganan, ugma sa hapon. Nabuhi siya kaniadto nga sama kaninyo karong gabhiona, ug milabang na sa luyo sa tabil kon diin kamo mopadulong usab sa umalabot nga panahon. Ug sa tanang mga gustong motabong sa maong panerbisyo, bueno, ginadapit kamo nga moadto. Mamahimo gayud kana nga dakung tabang sa pamilyang Colvin, ang mahibaloan nga ang tabernakulo dinhi, kon diin sila nagsimba sulod sa dugay na nga panahon, ug ingon niana, makaadto gyud. . . Ikalipay namo nga makaadto kamo. Ug sa hunahuna ko ang. . . ang minahal natong si Igsoong McKinney, nga mao'y nagwali sa lubong sa akong igsoong lalaki, daghan nang mga tuig ang milabay, siya mao ang may pinaka-importanteng bahin sa paglubong, ug ila akong gihangyo nga moadto ug tabangan siya sa—sa panerbisyo sa paglubong.

³ Karon, medyo naulahi gyud ako, niining gabhiona. Daghan man gud kaayo ko og kinahanglang buhaton, og wala ko kabalo kung unsa ang una kong adtoan. Daghan kaayo og tawag, ug duna pa gyu'y mga panagbangga ug mga disgrasya, ug nagapanawag ang mga tawo, nanagpangabot. Ngani, migikan ako sa Louisville, kaganina, para makabalik dinhi sa gilayon, ug gibiyaan sa ang pipila ka mga tawag nga wala gyu'y hunong ug kinahanglan nang maatiman, sa hunahuna ko, karong gabhiona, na mismo. Ug mao nga iampo n'yo kami samtang magapadayon kami.

⁴ Ug kaganinang buntag wala na ako—ako makadangat sa akong—akong teksto, sa ika-7 nga kapitulo sa Basahon sa—sa—sa Mga Hebreohanon. Ug samtang nagapakli kita niini, karong gabhiona, gusto kong maghatag og pagpahibalo mahitungod sa panagtigum ni Igsoong Graham Snelling, dinha sa tolda,

sa may tumoy sa Brigham Avenue. Kung itugot sa Ginoo, buut kong mobalik sa Miyerkules sa gabii. Ug magtakda tà niana og usa ka gabii para moadto kita ingon nga usa ka grupo, niining semanaha, aron duawon si Igsoong Graham didto sa panagtigum. Ug siya. . . miingon, “Daghan kono ang nanambong.” Ug—ug ikalipay niya nga makatambong kita, ingon nga pagtabang. Kang Igsoong Graham Snelling, si kinsa man sa inyo nga motambong sa panagtigum, o gustong motambong, dinhi ra kana sa may tumoy sa Brigham Avenue. Hinoon makasulti man sa inyo ang si kinsa man kung asa kana. Dinha ra mismo sa tumoy sa dulaanan, napahimutang ang tolda. Ikalipay gyud niya ang inyong pagpakigtimbayayong. Tungod kay, kita ingon nga usa ka tabernakulo nagsaad man tà nga makigtimbayayong kaniya, sinto porsyento, mao nga nagapaningkamot gyud kita nga makatabang.

⁵ Bueno, sa dili madugay moadto na kita, kon itugot sa Ginoo, sa bahin mahitungod sa ika-11 nga kapitulo sa Mga Hebreohanon, sa pipila ka gabii, kung itugot sa Dios, ug dinha sa hunahuna ko magkaaduna usab kita og halangdon nga higayon.

⁶ Oh, gipanalanginan kita sa Ginoo ganinang buntag sa makakahibulongan nga paagi, ingon nga gibubo gayton Niya ang Iyang Espiritu nganhi kanato! Ug karon, niining gabhiona, nagalaum kita nga buhaton Niya kini pag-usab; ug sa Miyerkules sa gabii sàb, ug sa mosunod pa nga mga gabii. Ug—ug sa mga gabii nga wala ako, ania man si Igsoong Neville aron ipadayon kini, kon ugaling wala ako.

⁷ Wala ko mahibalo sa kung unsay akong pagabuhaton, mahimo man gud nga anaa ka dinhi niining orasa, ug sa lahi nga oras pagatawgon ka ngadto na pud sa California. Kita n’yo, wala gyud tà mahibalo kung asa tà ipadala sa Ginoo. Mao kana’y hinungdan nga malisud para nako nga magplano og mga pagbiyahe ug moingon nga atong—atong buhaton ang *ingon niani-ug-ingon niana*. Mahimong aduna ko’y sugdan nga buhaton, pero ipadala diay ako sa Ginoo sa ubang lugar. Kita n’yo? Busa wala gyud tà mahibalo kung unsa ba ang Iyang pagabuhaton. Apan, “Kung itugot sa Ginoo,” ingon—ani ang atong ginasulti. Ug nagatoo ko nga gitahasan kita, o gisugo, sa Biblia, “Kung itugot sa Ginoo, buhaton nato ang *ingon niani-ug-ingon nianang* mga butang.” Busa kung mahitabo man nga dili nato himo ang mga gikatak dang buluhaton nga atong. . . o dili matuman ang mga gikatakda nga buhaton, mabati nato nga tingali’g dili gusto sa Ginoo nga mahitabo kana.

⁸ Ngani niadtong miaging adlaw, nalangay kami, kami nila Igsoong Roberson ug Igsoong Wood. Ug natingala kami, “Ngano kaha?” Atua kami, nga ginatan-aw ang usa ka mapa, samtang ginasubay ang dalan, ug mibiyahe kami og singkwenta ka milya na usab pabalik sa amihanan. Ug dugay na man unta kong sigeng gaagi niadto nga highway sukad niadtong mga katorse

anyos pa lang ako. Ug mao nga natingala gyud ko kung nganong nahitabo kadto. Atua kami didto, kaming tulo. Nakaagi na man kami niadtong dalana. Ginatan-aw pud namo ang mapa, samtang nagasubay sa 130, miagi kami sa Illinois, ug miliko diyutay, wala namo namatikdan nga ang adlaw anaa na sa may luyo namo imbis nga sa atubangan namo. Paingon na diay kami sa amihanan imbis nga sa habagatan. Ug sa kalit lang, pagtabok namo sa dalan, ingon ko, “Dili na kini ang husto nga dalan.” Among gitan-aw, ug nasayran namo, nga napahilayo na diay kami og singkwenta ka milya ang gilay-on. Mibalik ra kami...?...

⁹ Dayon sa pagbalik namo, kami—nag-istoryahanay kami. Ingon ko, “Kabalo ba mo kung ngano? Kita...Tingali’g gitipas kita sa Ginoo sa niini nga direksyon, aron ilikay ta sa usa ka grabeng aksidente didtong dapita, nga mahimong maghinungdan og kadaut. Hingbaloan nato nga ang tanan nga mga butang masigtabang alang sa ikaayo niadtong mga nahigugma sa Ginoo. Kanunay natong hinumduman kana.”

¹⁰ Bueno, niining gabhiona, sugdan nato karon ang usa ka diyutay’ng leksyon sa pagtudlo. Ug kung akong...sa hunahuna ko mora’g dili na ta makadangat, pero basin makadangat ra diay kita karong gabhiona, sa...Ingon nga halangdon kini nga kapitulo sa pagtudlo mahitungod sa mga ikapulo, sa iglesia. Ug usa kini ka halangdong hilisgotanan, nga mahimo gani natong magpabilin niini sulod sa daghang mga semana, mahitungod niining usa ra ka butang, kung unsa nga si Abraham nagbayad og ikapulo ngadto kang Melquisedec, ug kung mahinungdanon ba kini.

¹¹ Nakadisturbo ba kining bentilador sa kang kinsa man dinha sa luyo? Mas gusto ba ninyong palongon na lang kini? Kung nakadisturbo kini sa kang kinsa man, nagaigo sa ilang nawong mismo, ang usa sa mga bentilador. Kung nakadisturbo man, ipataas lang ang inyong mga kamot. Ug, o kaha ato na lang paanhaon ang usa sa mga usher, dunay paanhaon nga usa ka igsoong lalaki, og palongon niya kini para sa inyo. Ug medyo ginapahilayo ko usab kini sa akoa mismo; tungod pag igangon man gud ko ug hinay-hinay na kong sington, nan, ang unang butang, ako’y—mapagaw na ako. Busa, depende ra kini sa inyo, dili kini makadisturbo kanako sa unsa mang paagi. Gusto lang namo nga mahimong komportable kamo.

Paninkamotan namo nga dili kamo langayon og ayo, ug modiritso na kita mismo sa Pulong. Ug sa dili pa nato buhaton kini, makigsulti una kita sa Tagsulat sa makadiyut.

¹² Karon, Langitnong Amahan, wala kami mahibalo sa kung unsay gikatagana nga mahitabo. Apan ang butang lang nga nahibaloan namo, ug ginatoohan, nga mga maayong butang ang napahimutang na sa unahan namo. Kay nahisulat kini, “Wala

makita sa mata, ni hidunggi sa dalunggan, ni misantop sa mga kasingkasing sa mga tawo, kung unsa ang gikatagana na sa Dios alang kanila, nga nahigugma Kaniya.”

¹³ Ug nagaampo kami nga Imong ablihan ang mga bintana sa Langit karong gabhiona, sa Imong balay-tipiganan, ug ihatag kanamo ang Imong Pulong, nga mamahimong usa ka butang nga maangayon, usa ka butang nga magadugang sa among pagtoo ingon nga mga Cristohanon, ug himoon kaming mas—mas lig-on diha sa Ebanghelyo, kaysa kung unsa kami sa pagsulod namo. Itugot kini, Amahan. Hinaut nga kuhaon sa Balaang Espiritu ang Pulong sa Dios ug ihatud Kini sa matag kasingkasing sumala sa among panginahanglanon. Sa Ngalan ni Jesus, kami nagaampo, ang Imong pinalanggang Anak. Amen.

¹⁴ Bueno, kaganinang buntag, natapos ta sa ulahing bersekulo sa ika-6 nga kapitulo, aron mahimo kita nga modiritso na sa ika-7.

Diin ang mag-uuna tungod kanato nahisulod na, si Jesus, nahimong labaw'ng sacerdote hangtud sa kahangturan, sumala sa laray ni Melquisedec.

¹⁵ Karon atong basahon ang unang tulo ka bersekulo, o ang unang duha ka bersekulo, o ang unang tulo ka bersekulo, diay, sa ika-7 nga kapitulo, aron makasugod na kita.

Kay kini si Melquisedec, hari sa Salem, principe sa Dios nga labing hataas, nga misugat kang Abraham nga nagapauli gikan sa pagpamatay sa mga hari, ug nanalangin kaniya;

Kang kinsa usab si Abraham mihatag sa ikapulo sa tanan, (mao kana ang mga ikapulo); sanglit una sa tanan kung hubaron Hari sa pagkamatarung. . . unya Hari usab sa Salem, nga sa ato pa, Hari sa pakigdait;

Walay amahan, walay inahan, walay kagikanan, . . . walay sinugdan. . . walay sinugdan sa mga adlaw, ni katapusan sa kinabuhi; kondili gibuhat nga sama sa Anak sa Dios; nagapadayon nga sacerdote hangtud sa kahangturan.

¹⁶ Pagkaanindot gayud nga pahayag! Karon kinahanglan natong balikan ang Daang Tugon, aron hibaloon kining bililhon nga mga unod. Ug, oh, gusto ko gayud ang mga niini!

¹⁷ Kabalo mo, didto sa Arizona, nagapanuhid kami og bulawan kaniadto. Ug nagaadto kami sa usa ka bahin sa yuta nga dunay bulawan kon tan-awon, kami ni Mr. Mc Anally. Ug mangita kami og lugar nga mora'g, may gagmay'ng mga kanal, kon diin duna pu'y awasanan sa tubig, ang tawag gani nila niadto “banlasan.” Ug akong. . . Iya akong papungkoon ug akong kuskoson ang mga balas ug “whew,” huypan kadto. Dayon kuskoson ug “whew,” huypan na pud. Ug naghunahuna sab ko kung nganong ingon-

adto ang iyang ginabuhat. Nahibaloan ko, nakita n'yo, pag huypan n'yo ang balas, mapalid kana. Ug tanan na, bisan ang tingga, nga mas gaan kaysa bulawan. Mas bug-at man ang bulawan kaysa tingga. Mao nga kon huypan mo, mangapalid ang tanang uban pa nga mga metal ug balas ug hugaw, pero mahibilin ra dinha ang bulawan. Busa, kung adunay mga nabanlas *dinhi* gikan sa itaas, nagapakita kana nga adunay gagmay'ng bulawan dinha dapit sa itaas. Ginabanlas man sa ulan ang mga gagmay niini. Busa kuhaon na namo ang mga piko ug uban pa, ug kaloton ang taas nga bahin sa yuta, halos, sa pagpaningkamot nga makaplagaan kadtong bulawan. Bangagan namo ang yuta, og kaloton kadto. Magbutang mi og dinamita, og pabuthon kadto. Padayon ra namong pabuthon ang mga bangag, pailalum hangtud nga makita na namo, makita ang pinakanahimutangan sa bulawan. Bueno, mao kadto ang ginatawag namo nga "pagpamulawan."

¹⁸ Ug karong gabhiona paningkamotan natong kuhaon ang Pulong sa Dios, ug gamiton Kini pinaagi sa gahum sa Balaang Espiritu, aron huypon palayo kanato ang tanang kawalay-pagpakabana ug mga pagduhaduha, og tanan nang gagmay'ng gaan nga mga butang nga wala gayu'y pundasyon, kanang mga walay bili sa atong kinabuhi, gusto natong huypon kining tanan palayo aron makaplagaan nato ang mahimayaong Nahimutangan. Ang Nahimutangan nga mao si Cristo.

¹⁹ Ug karon hinaut nga tabangan kita sa Dios samtang magabasa kita ug magatuon sa Iyang Pulong. Sa ulahing, naunang tulo ka kapitulo, halos, nahisgotan na nato ug nadungog, sa karon ug unya, ang mahitungod kang Melquisedec.

²⁰ Bueno, sa hunahuna ko husto gyud ang pagsaysay ni Pablo.

Kay kini si Melquisedec, hari sa Salem, . . .

"Hari sa Salem." Ug nasayod ang si kinsa mang makinaadmanon sa Biblia nga ang Salem mao kaniadto . . . ang Jerusalem gitawag kaniadto og "Salem." Ug Siya mao ang Hari sa Jerusalem. Matikdi n'yo Siya.

. . . sacerdote sa Dios nga labing hataas, (usa ka tigpangaliya), nga misugat kang Abraham . . .

Buut kong hisgotan sa ang Iyang kaliwatan, sa niining halangdon nga Tawo, aron mahibaloan ninyo kung Kinsa Siya, una, ug dayon inyong . . . atong padayonon ang maong estorya.

. . . nga nagapauli gikan sa pagpamatay sa mga hari, ug nanalangin kaniya;

Kang kinsa . . . si Abraham mihatag sa ikapulo . . . una . . . kung hubaron Hari sa pagkamatarung, . . .

Karon matikdi n'yo, "Pagkamatarung." Bueno, aduna man kita'y kinaugalingong-pagkamatarung, aduna kita'y patoo-too nga pagkamatarung, aduna pud kita'y gituis nga

pagkamatarung, og tanan na nga matang. Apan aduna gyu'y usa ra ka tinuod nga pagkamatarung, ug nagagikan kana nga pagkamatarung sa Dios. Ug kini nga Tawo mao ang Hari sa pagkamatarung. Kinsa kaha Siya?

²¹ Bueno, Siya mao ang Hari sa pagkamatarung, ang Hari sa Jerusalem, ang Hari sa pagkamatarung, ang Hari sa pakigdait. Ngani si Jesus gitawag man nga, "Ang Principe sa pakigdait." Ug ang principe anak man sa usa ka hari. Busa, kon kini nga Tawo mao ang Hari sa pakigdait, kung ingon-ana Siya mao ang Amahan sa Principe sa pakigdait. Nasabtan n'yo ba?

²² Karon atong tan-awon, maghisgot pa tà og dugang bahin sa Iyang kaliwatan, aron atong makita kung asa kita mopaingon.

Walay amahan, . . .

Bueno, si Jesus kaniadto adunay Amahan. Nagatoo ba kamo niana? Oo Mao gayud.

. . . walay inahan, . . .

Si Jesus aduna pu'y inahan. Apan kini nga Lalaki walay amahan ni inahan man.

. . . walay kagikanan, . . .

Walay si kinsa man nga Iyang gigikanan, walay unsa man nga kagikanan. Ingon-ana Siya sa una pa. "Walay kagikanan."

. . . walay sinugdan sa mga adlaw, . . .

Wala Siya'y unsa mang panahon kon kanus-a Siya nagsugod.

. . . ni katapusan sa kinabuhi; . . .

Kana wala na gyu'y uban pa kondili ang Dios mismo. Mao gyud Kana.

²³ Karon, kung matikdan ninyo karon samtang basahon nato ang sunod nga bersekulo. Kita n'yo? "Una, kung hubaron, Hari sa pagkamatarung." Dili diay kana ang buut kong basahon. Ang—ang ika-3 nga bersekulo diay:

. . . ni katapusan sa kinabuhi; kondili gibuhat nga sama sa Anak sa Dios; . . .

Bueno, dili Siya ang Anak sa Dios, kay, kung Siya Anak man, nan aduna Siya'y sinugdan. Pero kini nga Tawo wala ma'y sinugdan. Kung Siya Anak man, nan siguradong aduna Siya'y amahan ug inahan. "Pero kini nga Tawo walay amahan ni inahan. Kondili gibuhat Siya nga *sama sa* Anak sa Dios."

. . . nagapadayon nga sacerdote hangtud sa kahangturan.

²⁴ Karon, ginaingon ni Dr. Scofield, nga, "Usa kono kadto ka pagka-sacerdote, nga gitawag og, 'Ang pagka-sacerdote ni Melquisedec.'"

Pero gusto ko lang hisgotan sa ang bahin niana diha kaninyo sa pipila ka gutlo. Kung usa kadto ka pagka-sacerdote, nan siguradong aduna kadto'y sinugdan, ug siguradong aduna pud kadto'y katapusan. Apan, "Wala kadto'y sinugdan o unsa man nga katapusan." Ug wala pud siya miingon nga usa ka pagka-sacerdote ang natagbo niya. Kondili usa ka Tawo ang natagbo niya, ug gitawag ang Iyang Ngalan og "Melquisedec." Usa Siya ka Tawo, dili usa ka denominasyon, dili usa—usa—usa ka pagka-sacerdote o usa ka pagka-amahan. Siya'y bug-os gayud nga usa ka Tawo nga Ginganla'g Melquisedec, nga mao'y Hari sa Jerusalem. Dili nga usa ka pagka-sacerdote, kondili usa ka Hari nga walay amahan. Walay amahan ang pagka-sacerdote. "Ug kini nga Tawo walay amahan, walay inahan, walay sinugdan sa mga adlaw o katapusan man sa kinabuhi." Karon, ang Anak sa Dios. . .

²⁵ Kung kinsa kini, kini mao si Jehovah. Kini mao ang Dios Mismo nga Makagagahum-sa-tanan. Wala na'y lain pa.

²⁶ Karon matikdi n'yo, "Siya nagapadayon hangtud sa kahangturan." Ngani aduna man siya'y pagpamatuod dinhi, nga, "Siya buhi. Siya dili gayud mamatay." Siya dili gayud. . . Siya wala na'y lain kondili buhi sa dayon. "Siya nagapadayon hangtud sa kahangturan."

²⁷ Bueno, gibuhat si Jesus, nga sama Kaniya. Pero, ang hinungdan nga adunay kalahian tali sa Dios ug ni Jesus: si Jesus aduna ma'y sinugdan; ang Dios walay sinugdan. Si Melquisedec walay sinugdan, ug si Jesus adunay sinugdan. Apan gibuhat si Jesus, nga sama Kaniya. "Usa ka sacerdote, nga nagapabilin hangtud sa kahangturan."

²⁸ Bueno, kaniadtong ania sa yuta si Melquisedec, Siya wala na'y lain kondili ang—ang Jehovah nga Dios nga nadayag pinaagi sa paglalang, ania Siya kaniadto nga sama sa usa ka theophany. Ngani nahinagbo Siya ni Abraham sa makausa, sa iyang balongbalong. Ug sa gikaingon nato kaganinang buntag, "naila Siya ni Abraham. Ug Iyang gisultihan si Abraham kung unsa ang pagabuhaton Niya, tungod kay dili man Niya mapasagdan nga ang manunonod sa kalibutan mahimong buta sa mga butang nga Iyang pagabuhaton."

²⁹ Mohunong úsa ko dinhi sa makadiyut, aron moingon nga, mao ra sa gihapon ang hunahuna sa Dios mahitungod sa Iyang Iglesia. Dili kamo mga anak sa kangitngit. Kondili mga anak kamo sa Kahayag. Ug ang. . .kita ang. . ."Bulahan ang mga maaghop, kay sila magapanunod sa yuta." Ug kon ang Dios, Nga namuhat kang—kang Abraham, nga mao'y magapanunod sa yuta. . . Ug miingon Siya, "Dili Ko ililong kining mga butanga sa tawo nga magapanunod sa yuta." Labi pa gayud nga Iyang ipadayag ang Iyang mga tinago ngadto sa Iyang Iglesia nga magapanunod sa yuta!

³⁰ Miingon si Daniel, “Niana nga adlaw sila modalagan ngadto-nganhi, og ang kahibalo mouswag.” Ug ingon pa siya, “Ang mga makinaadmanon makaila sa ilang Dios, niana nga adlaw, ug makakab-ot sa dagkung mga butang niana nga adlaw. Apan ang mga dautan dili makaila sa Dios sa Langit.” Hinoon naila nila Siya sa usa ka porma ug sa usa ka seremonya lang, sama sa ato nang gikaingon sa una natong leksyon, pero wala nila Siya naila sumala sa paagi sa kahingpitan.

³¹ Ug makapamuhat lang ang Dios pinaagi sa kahingpitan, tungod kay Siya hingpit man. Dalaygon ang Iyang Ngalan! Kinahanglang pinaagi gyud sa usa ka hingpit nga paagi nga mamuhat ang Dios, tungod kay wala na man Siya’y unsa pa man nga mahimo kondili ang mamuhat pinaagi sa kahingpitan. Dili Niya mahimong hugawan ang Iyang Kaugalingon sa unsa mang paagi. Ug mao kana kon nganong mianhi si Jesus aron sa pagkuha sa atong mga sala, aron mamahingpit kita, aron makapamuhat ang Dios pinaagi sa Iyang Iglesia. Mao kana ang tinago.

Dinha nabutahan ang kalibutan. Dinha sila gustong moingon, nga, “Wala ka na sa husto mong pangisip.” Dinha sila gustong moingon, “Wala ka man nasayod sa imong ginasulti.”

Tungod, “Ang mga butang nga iya sa Ginoo kabuangan man para sa kaalam niining kalibutana. Apan ang mga butang nga iya sa kalibutan karnal pud para sa magtotoo.” Mao nga, usa kamo ka lahi na nga tawo, nagakinabuhi kamo sa usa ka lahi na nga kahimtangan. Dili na kamo iya niining kalibutana. Miagi na kamo gikan niini nga kinabuhi ngadto sa usa ka bag-ong Kinabuhi.

³² Busa, nagapadayag ang Dios, dili sa kalibutan, dili sa sikolohista, dili sa mga edukado nga ministro, kondili sa mga mapainubsanon diha sa kasingkasing. Sa Iyang katawohan nga mga maaghop, igapadayag Niya ang mga tinago bahin sa mga mahimayaong butang sa Dios, ngadto kanila. Nasabtan n’yo ba?

³³ Karon, bueno, si Abraham ang magapanunod sa yuta. Pinaagi sa . . . Binhi ni Abraham pagapanalanginan ang tanang mga kanasuran. Busa mikanaug ang Dios ug nagpakig-istorya kaniya, sa porma sa usa ka Tawo.

Bueno, ang Dios sa una pa anaa man sa yuta. Wala gyud sukad gibiyaan sa Dios ang yuta. Kung biyaan Niya ang yuta, ambot lang kung unsa kaha’y mahitabo niini. Pero ang Dios sa una pa ania na sa kung unsa nga porma. Oh, dalaygon ang Iyang Ngalan!

³⁴ Ngani ania Siya kaniadto sa kamingawan kauban ang mga anak, nga migawas gikan sa Egipto, sa porma nga usa ka Kahayag. Nagpakig-istorya Siya kang Abraham sa porma sa usa ka Tawo. Nagpakig-istorya Siya kang Moises sa porma sa usa ka

Tawo. Nagpakig-istorya pud Siya sa Iglesia diha sa porma sa usa ka Tawo, ang Iyang Anak, nga si Jesus Cristo.

Ug nagapakigsulti Siya pinaagi sa Iyang Iglesia karong panahona, pinaagi sa dinihogan nga Iglesia sa buhi nga Dios, pinaagi sa mga sudlanan nga lapok. “Kamo mao ang mga sanga. Ako mao ang Punoan sa parras.” Ang Dios nagapakigsulti gihapon hangtud karon, ug makita sa kalibutan si Jesus sumala sa inyong pagpaila Kaniya. Sa ingon-anang paagi makita sa kalibutan. . . “Kamo ang mga sinulat nga sulat, nga ginabasa sa tanang mga tawo.” Ang inyong kinabuhi ang nagasulti kung unsa kamo.

³⁵ Bueno, kining si Abraham sa iyang pagpaingon, pagpauli kaniadto. Balikan sà nato ug basahon sa makadiyut lang ang mahitungod kaniya, diha sa Basahon sa Genesis. Sa ika-14 nga kapitulo sa Genesis, nagatoo ko nga mao kana. Oh, pagkaanindot gayud niini nga estorya dinhi! Karon, nasayod man kitang tanan bahin kang Abraham, kung unsa nga gitawag siya sa Dios pagawas sa yuta sa Caldehanon ug sa siyudad sa Ur, ug gisultihan siya nga ihimulag ang iyang kaugalingon gikan sa iyang mga kaubanan.

Nagapanawag man ang Dios sa mga kalalaken-an o mga kababayen-an, nagapanawag Siya para sa paghimulag.

³⁶ Pero, mao kana ang problema sa mga kaiglesiahan sa karong panahon, ayaw nilang ihimulag ang ilang mga kaugalingon gikan sa dugay nang karnal nga magto- . . . mga dili-magtotoo. Mao kana kon nganong dili kita makapadayon. Nagapaanod-anod man gud kita diha nianang karnal nga agos, ug kita—nagaingon kita, “Oh, maayong tawo man si Jim, bisan nagainom siya’g ilimnong makahubog. Bisan siya’y . . . Ug nagakuyog-kuyog ko sa iyaha sa bilyaran, pero dili man ko nagadula og bilyar. Ako—ako—nagakuyog-kuyog ako sa iyaha sa pagparty-party. Nagasulti sila’g mahugaw nga mga pagpakatawa, ug uban pa, pero ako wala man ko nagasulti og unsa mang pagpakatawa.”

³⁷ “Panggula kamo gikan kanila.” Husto kana. “Ihimulag n’yo ang inyong kaugalingon. Dili kamo maghikap sa ilang mahugaw nga mga butang, ug dawaton Ko kamo,” ang ingon sa Ginoo. “Ayaw kamo pagpahiangay kauban sa mga dili-magtotoo, diha sa mao rang usa ka yugo.” Ayaw n’yo buhata kana. Ihimulag n’yo ang inyong kaugalingon.

³⁸ Ug gitawag sa Dios si Abraham aron ihimulag niya ang iyang kaugalingon gikan sa tanan niyang mga kabanay, ug aron maglakaw kauban Siya. Igsoon, usahay gikinahanglan mong biyaan ang iglesia. Ingon niana ang nahitabo kang Pablo. Gikinahanglan niya niadtong biyaan ang iyang iglesia. Ingon niana sàb ang nahitabo sa kadaghanan. Usahay gikinahanglan mong biyaan ang imong panimalay. Usahay

sàb gikinahanglan mong biyaan ang imong amahan ug inahan, ug talikdan ang tanan. Dili ko ginaingon nga ingon-ana ang gikinahanglan sa tanang higayon, apan usahay ingon-ana gyud ang gikinahanglan. Ang pasabot niini nga gikinahanglan mong wagtangon ang tanan-tanan tali kanimo ug sa Dios, ug maglakaw nga kauban Siya lamang. Oh, mapanalanginon gayud, kanang bililhong pagpakighiusa, kanang pagpakigkauban nga maangkon ninyo pag ihimulag n'yo ang inyong mga kaugalingon gikan sa mga butang nga iya sa kalibutan ug sa karnal nga mga magtotoo nga nagabiaybiay kaninyo, ug mag-inusara nga maglakaw kauban si Cristo!

39 Pagkadaghan nang higayon nga akong gipasalamatan ang Dios! Miingon Siya, “Hatagan Ko kamo og mga amahan ug mga inahan sa niining kasamtangang kalibutan. Hatagan Ko kamo og mga higala ug mga kaubanan. Ug dili Ko kamo biyaan, ni dili Ko kamo talikdan. Bisan pa og talikdan kamo sa tibuok kalibutan, Ako magauban kaninyo, hangtud sa katapusan sa panaw.”

40 Usa gayud ka mapanalanginong pribilihiyo, nga ang tawo adunay ingon-ana nga hagit para mosunod kang Ginoong Jesus, nga ihimulag ang iyang kaugalingon gikan sa tanan niyang mga karnal nga kaubanan, aron mosunod sa Ginoo! Ug kung ang si kinsa mang tawo daw sa wala nagminatarung, ug wala nagapaila sa ilang mga kaugalingon ingon nga mga Cristohanon, pero ginahigugma hinoon ang mga karnal nga butang, mas maayo pa nga mangita ka na og laing kauban sa gilayon. Husto kana. Ug kon ugaling walay mouban kanimo sa paglakaw, aduna ma'y Usa nga nagsaad nga mouban kanimo sa paglakaw. Kana mao, ang mapanalanginong Ginoong Jesus, mouban Siya kanimo sa paglakaw.

41 Tuod man gisultihan sa Dios si Abraham nga, “Ihimulag mo ang imong kaugalingon.” Ug ingon nga tawo ra lagi si Abraham, gikuyog niya ang iyang amahan, gikuyog niya usab ang anak sa iyang igsoon, ang iyang pag-umangkon; mikuyog silang tanan sa iyaha. Ug wala gyud siya gipanalanginan sa Dios hangtud nga gituman niya ang gisulti sa Dios kaniya nga angay'ng buhaton.

42 Dili ko ginaingon nga dili kamo Cristohanon. Bueno, wala ako nagaingon nga dili-Cristohanon ang si bisan kinsa. Pero isulti ko kini, nga kung gisultihan kamo sa Dios nga buhaton ang usa ka butang, dili Niya kamo pagapanalanginan gawas kon tumanon n'yo kana. Ngani ania ako sa pulpito karong gabhiona nga usa sa niining mga butang nagapabilin pa nganhi kanako. Mao nga ang akong mga panagtigum dili nangahimong sama sa kung unsa gyud unta ang mga niini, sa nangaging duha ka tuig. Tungod kay gipakyas man nako ang Ginoo. Iya akong gisultihan nga, “Moadto ka sa Africa, ug dayon sa India.” Ania gani kini, nakasulat dinhi mismo, sa may luyo niini nga Basahon, ania mismo.

43 Gitawgan ako sa tigdumala, miingon, “Pasagdi sa ang mga Afrikaan. Nakaandam na ang India.”

44 Gitagbo ako sa Balaang Espiritu, miingon, “Moadto ka sa Africa maingon sa gikasulti Ko na nga imong buhaton.”

45 Ug milabay ang usa pa ka tuig. Ug ang mga tigdumala . . . nakalimtan ko na ang mahitungod Niini. Ingon siya, “Sa India kita moadto. Ania na ang mga tiket.”

46 Milarga ko niadto, og nakalimtan ko na Kini hangtud nga nakadangat ako sa Lisbon. Usa ka gabii, niadto, abi ko og mamatay na ko. Pagkasunod buntag miadto ko, didto sa lawak-ligoanan, aron maligo na. Oh, dili gayud maayo ang akong gibati niadto, dili na gud ko halos makatindog. Didto, kanang Kahayag nga nagpaibabaw sulod sa lawak-ligoanan, miingon, “Abi Ko ba og gisultihan Ta na ka nga ‘Moadto ka sa Africa, una.’”

47 Ang akong mga panagtigum sugod nang nagakahinay nga nagakahinay sukad niadtong higayona. Bisan tuod og nakasangyaw ako sa India, nga may halos katunga sa milyon ang nanambong didto, apan dili man kadto ang gisulti sa Dios nga angay kong buhaton. Nabati ko nga dili na gayud magmalampuson ang akong mga panagtigum hangtud nga mobalik ako ug ihusto kadto nga butang. Bisan unsa pa’y buhaton ko, ang Africa gyud angay, ang una, tungod kay gikinahanglan gyud kining buhaton. Atua ang Eternal nga Pulong sa Dios, atua didto. Mas nasayod gyud ako. Mao nga kinahanglan ko gayu’ng mobalik. Ug nabati ko nga kining moabot nga tuig mao na ang higayon nga mahigawas ako gikan niini, pinaagi sa tabang sa Ginoo.

48 Kining mahimayaong, karaang Ebanghelyo nga paspas nga nagatubo, sama sa usa ka kahoy’ng encina, nagatoo ako nga andam na gyud siyang manalingsing og mga sanga karon. Nagatoo ako niini, niining halangdong Mensahe ug halangdong butang, nagatoo ako nga tugotan kita sa Ginoo nga tay-ogon pag-usab ang kalibutan alang sa kahimayaan sa Dios.

49 Mao nga kinahanglan n’yong tumanon kung unsa ang gisulti sa Dios kaninyo nga angay’ng buhaton. Ug mipanaw si Abraham kaniadto, og gikuyog ang iyang mga paryenti. Gihigugma man gud niya sila. Kabahin na kana sa pagkatawhanon. Apan wala magdugay, sa pagdagan sa panahon, namatay ang iyang amahan ug iyang gilubong siya. Ug kauban man niya ang iyang pag-umangkon, mao nga nahitabo ang mga panag-away ug mga panaglantugi. Ug, sa katapusan, nagdesisyon si Lot ug miadto sa Sodoma. Ug kon namatikdan n’yo si Abraham, wala siya nakiglantugi kang Lot. Ingon siya, “Managsoon kita. Dili kita angay’ng maglalisay. Mao nga iyahat mo ang imong ulo ug umadto ka sa kon asa nga direksyon mo gustong moadto. Kung moadto ka sa sidlakan, moadto ako sa kasadpan. Kon moadto ka sa amihanan, moadto pud ko sa habagatan.” Ingon niana ang

angay nga taras sa Cristohanon, andam gayud nga ihatag ngadto sa usa pa ka tawo ang pinakamaayo sa kasabotan. Kanunay n'yong ipresentar kana kaniya, ihatag kaniya ang pagpili.

⁵⁰ Kay ngano man? Unsa ma'y nagpahinungdan kang Abraham nga buhaton kadto? Nasayod man gud siya nga gisaaran siya sa Dios nga pagapanundon niya ang tanang butang, bisan unsa pa ang mahitabo. Amen. Busa, bisan pa'g, usa ra ka balongbalong o usa ka payag, nganong mabalaka man ta? Panag-iya man nato ang tanang butang. "Bulahan ang mga maaghop kay sila magapanunod sa yuta." Panag-iya nato ang tanan niini. Mao kana'y giingon sa Dios. Busa ihatag sa tawo ang pinakamaayo nga kapilian, kung gusto man niya. Tingali'g mao na kana tanan ang iyang puedeng maangkon. Apan kining tanan panag-iya man ninyo, ingon nga mga manunod sa kaluwasan pinaagi sa saad. Inyoha kining tanan.

⁵¹ Busa, si Sarah, ang pinaka matahum nga babaye sa yuta kaniadto, atua siya didto sa kilid sa bungtod uban sa iyang bana maingon sa angay niyang buhaton. Siya'y yano ra, bueno, tingali'g nagasul-ob siya og simple ra nga mga baratohon nga bistida, o kung unsa man ang tawag n'yo niana. Samtang, si Mrs. Lot nakabisti gayud nga sama sa usa ka milyonaryo. Ug ang iyang bana pa gyud mao ang mayor sa siyudad. Usa siya ka maghuhukom nga nagalingkod sa may ganghaan. Anaa na sa asawa ni Lot ang tanan; nagaapil siya sa tanang kapunungan sa pagpanahi ug mga pagparty-party sa pagdula'g baraha nga ginapahigayon kaniadto sa Sodoma ug Gomora. Apan si Sarah mas nagmalipayon siya nga magkinabuhi uban sa iyang bana sa malisud nga kahimtang, pero nasayod nga anaa siya sa kabubut-on sa Dios, kaysa malipay sa mga bahandi, o, sa kalipayan sa mga bahandi sulod sa usa ka panahon. Husto kana. Mao kadtong tungora nga miduaw ang Dios.

⁵² Ug usa ka adlaw, kamo, sa ingon ka sigurado nga gipili n'yo ang sayup nga dalanon, masakpan ra sab kamo niana sa umaabot nga adlaw. Tingali nagahunahuna kamo nga okey ra ang tanan. Tingali nagahunahuna kamo nga nakalusot kamo, apan dili gayud. Tingali daw sa walay nakamatikud niini, pero aduna gyu'y nakamatikud niini. Tungod hingsayran man sa Dios ang tanang butang. Hingsayran Niya kung sinsero ba gayud kamo sa inyong pagsugid o dili. Hingsayran Niya kung sinsero ba gayud kamo nga nagatoo Kaniya ug nga luwas na, ug gidawat na Siya, ug kung patay na kamo sa mga butang nga iya sa kalibutan, ug buhi na kamo diha kang Cristo. Hingsayran Niya kana.

⁵³ Karon, matikdan nato si Abraham, gusto ko nga inyo nga mamatikdan kining tinuod nga espiritu. Oh, kining tibuok mapanalanginong butang dinhi tungod ra gyud sa grasya. Gusto kong basahon n'yo uban kanako karon gikan sa ika-14 nga kapitulo sa Exodo, sa makadiyut lang.

⁵⁴ Bueno, ang unang butang nga nahitabo sa pagdangat nila didto, nagkaproblema si Lot. Ngano man? Tungod wala man siya sa kabubut-on sa Dios. Ug kung magkaproblema ka samtang anaa ka sa kabubut-on sa Dios, tabangan gyud ka sa Dios. Pero kung magkaproblema ka gani, nga wala ka sa kabubut-on sa Dios, nan adunay usa lang ka butang nga angay mong buhaton, ang mobalik diha sa kabubut-on sa Dios.

⁵⁵ Bueno, nanagkatigum ang mga hari kaniadto, ug nasayran nila nga ang mga kapatagan didtong dapita maayo ang patubig, ug mao nga nangadto sila para angkonon kadtong gamay'ng karaan nga Sodoma, Gomora, og okupahon kadto. Ug naokupar gyud nila. Ug sa pag-adto nila didto ug naokupar na kadto, gidala nila nga bihag si Lot.

⁵⁶ Gusto kong matikdan n'yo dinhi ang Espiritu ni Cristo nga anaa kang Abraham. Karon matikdi n'yo ang ika-14 nga bersekulo.

Ug sa pagkadungog ni Abraham nga ang iyang igsoon... (Nakuha ba ninyo?) ...ang iyang igsoon nahimong binihag, gimandoan niya ang iyang mga binansay nga mga tawo, nga nangatawo sa iyang balay, tutulo ka gatus ug napulo'g walo, ug ilang giapas sila hangtud sa Dan.

⁵⁷ Oh, pagkamapanalanginon gayud nga kasayoran mahitungod sa grasya! Si Abraham, kaniadtong ang iyang igsoon, bisan pa nga nahulog kini gikan sa grasya, bisan pa nga naanaa sa pagka-backslide nga kahimtang, sa pagkadungog niya nga gisakmit sa kalibutan si Lot, ug gidakop ug gibihag, aron patyon, namuhat si Abraham pinaagi sa Espiritu ni Cristo. Miabot siya ug gimandoan ang tanan niyang mga tawo nga nangatawo sa iyang balay, ug gigukod ang mga hari, ug giapas sila hangtud ngadto sa Dan. Ug ang Dan mao ang kinatumyan na nga bahin sa Palestina, "Dan paingon sa Beer-sheba," gikan sa usa ka tumoy ngadto sa pikas tumoy. Ug tipo kini ni Cristo, sa dihang nakita Niya nga ang kalibutan gibihag... nahulog, mao nga gigukod Niya ang kaaway hangtud sa katapusan, aron ipahibalik ang nahulog nga kaliwatan ni Adan.

⁵⁸ Gusto kong matikdan n'yo ang sunod nga bersekulo, pagkatam-is gayud nga nanulti dinhi ang Espiritu pinaagi kaniya. Sige, sa ika-15 na nga bersekulo karon.

Ug nabawi niya ang tanan (tanan) nga mga butang, ug ingon man usab si Lot nga iyang igsoon, ug ang iyang mga bahandi, ug ingon man usab ang mga babaye, ug ang katawohan.

⁵⁹ Sa dihang gigukod ni Abraham ang kaaway nga mibihag sa iyang igsoon, giapas niya gayud siya hangtud latas sa tibuok nasud, hangtud sa Dan, ug gibakwi ang tanan-tanan nga naiwala sa iyang igsoon sa pagkahulog.

⁶⁰ Pagkaanindot gayud nga hulagway ni Cristo, Nga nadungog sa Langit nga nangalaglag kita ug mao nga miabot ug gigukod ang kaaway, hangtud ngadto sa impiyerno, ug gibakwi ang nahisalaag nga mga kalag ug gipahibalik kita ug giuli sa ato ang tanan-tanan nga aduna kanato kaniadto sa wala pa ang pagkahulog! Kita, nga mga nag-backslide, kita nga mga gipanganak aron mahimong mga anak sa Dios, pero natuis sa pagkahimong mga anak sa yawa, ug nahimong . . . nanaggawi uyon sa mga butang sa kalibutan, ug nanagbuhat og sayup, ug nangahimong mahakogon nga sama ni Lot, nga gibaligya ang atong pagkapanganay ug gitinguha ang mga butang nga iya sa kalibutan. Mikanaug si Cristo. Bisan pa nga nahulog ta; ang Dios, ingon nga nasayod na sa sinugdan kaniadto kung kinsa ang maluwas ug kung kinsa ang dili, busa mikanaug ug gigukod ang kaaway sa kinabuhi, hangtud sa kamatayon, hangtud sa paraiso, hangtud sa impiyerno. Ug gikan pa sa Himaya hangtud sa impiyerno, ug giilog ang—ang mga gahum sa impiyerno, ug ang mga yawi gikan sa yawa, ug nabanhaw, ug gipasig-uli ang tawo, aron mamahimo pag-usab nga mga anak nga lalaki ug mga anak nga babaye sa Dios.

⁶¹ Nakita n'yo ba ang Espiritu nga anaa kang Abraham kaniadto, ang Espiritu ni Cristo nga nagauban kaniya?

⁶² Karon gusto ko nga inyong matikdan pa og ayo, samtang magabasa kita.

Ug migula ang hari sa Sodoma sa pagsugat kaniya sa iyang pagpauli gikan sa pagpatay sa niining hari nga si Chedorlaomer, ug . . . sa mga hari . . . nga kauban niya, sa walog sa Sabe, nga mao ang walog sa hari.

⁶³ Nanggawas sila. Napahibalik ang hari sa Sodoma. Nabawi balik ang iyang igsoon. Nabawi balik ang mga anak. Ug atua ang mga hari nga nanggawas aron sa pagsugat kaniya. Ug, usab, ania kon diin ko gustong hisgotan, ang mensahe karon. Matikdi n'yo dinhi.

Ug—ug unya si Melquisedec, nga hari sa Salem (Hari sa Jerusalem, Hari sa pakigdait) mikuha og tinapay ug vino: ug siya mao ang sacerdote sa labing labaw nga Dios.

Ug siya gipanalanginan niya, ug miingon, Dalayegon si Abraham sa Dios nga labing labaw, nga tag-iya sa mga langit ug sa yuta:

⁶⁴ Si Melquisedec, ang Hari sa Salem, girepresentar usab ang Iyang Kaugalingon taliwala sa uban pang mga hari. Ug matikdi n'yo, tapos na niadto ang pagpakiggubat, ang Espiritu sa Dios nga atua kang Abraham, si Cristo, nga nagpahibalik sa iyang igsoon nga nahulog, dayon gipasig-uli siya pabalik sa husto niyang kahimtang, og sa tanan-tanan nga iyang naiwala. Gipahibalik niya kadto. Ug sa napahibalik na niya, mikuha Siya

og tinapay ug bino, ang komunyong. Dili pa ba ninyo makita kung Kinsa kadtong si Melquisedec? Ang Dios kadto. Nga nagpahigayon sa maong komunyong, human sa pagpakiggubat.

⁶⁵ Karon moabli na usab kita, sa Mateo 26:26, sa gilayon, ug tan-awon nato ang gisulti ni Jesus dinhi mahitungod niana. Sa Basahon sa Mateo, sa ika-26 nga kapitulo ug usab sa ika-26 nga bersekulo, gusto natong magbasa og diyutay dinhi. Sige, Mateo 26:26.

Unya si Jesus miadto kauban nila sa usa ka dapit nga ginganlan og Golgota, Golgota, o Getsemani, (diay,) ug miingon sa iyang mga tinun-an, Panglingkod kamo dinhi, samtang moadto pa ako sa unahan aron sa pag-ampo.

⁶⁶ Sa hunahuna ko mora'g dili mao ang Kasulatan nga akong napakli. Mateo, sa ikabaynte- . . . ika-26 nga bersekulo sa ika-26 nga kapitulo. Kung adunay nakapakli na niini, basaha kini para sa ako, kung inyo—kung inyo nang nakita kini. Kadiyut lang. Usa man gud kini ka maanindot nga tipo dinhi. Mao nga dili ko gustong masayloan ninyo kini. Ania na. Mao na kana, igsoon.

Ug sa nagakaon sila, si Jesus mikuha og tinapay, ug gipanalanginan kini, . . .

Unsa man kadto? Tapos na niadto ang pagpakiggubat.

. . . gipikaspikas kini, ug gihatag ngadto sa iyang mga tinun-an, ug miingon, Kumuha, ug kumaon kamo; kini mao ang akong lawas.

⁶⁷ Makita n'yo ba si Melquisedec? Gatusan ka mga katuigan sa wala pa kadto, kaniadtong gihinagbo Niya si Abraham, human nga natapos na ang pagpakiggubat, naghatag Siya og tinapay ug bino. Ug dinhi pud gihatagan ni Jesus ang mga tinun-an, human sa Iyang malisud nga mga pagpakiggubat, gihatagan Niya sila og tinapay ug bino. Matikdi. Matikdi n'yo ang umalabot nga Pag-anhi.

Ug gikuha niya ang copa, ug—ug nagpasalamat, ug gihatag kini kanila, nga nagaingon, Uminom kamo nga tanan niini;

Kay kini mao ang akong dugo sa bag-o nga tugon, nga igaula tungod sa . . . mga sala ug kapasayloan sa mga sala.

Ug ako nagaingon kaninyo, nga gikan karon dili na ako magainom niining bunga sa parras, hangtud niadtong adlaw nga magainom ako sa bag-o niini kauban ninyo sa gingharian sa akong Amahan.

⁶⁸ Anaa sàb kita sa pagpakiggubat karon. Ginaapas usab nato ang atong igsoon nga nahulog, nga ang Dios, sa wala pa ang pagkatukod sa kalibutan, nakita na ug gipili-nang-daan ngadto sa Kinabuhing Walay Katapusan. Ug nadala siya sa

alimpulos sa mga butang nga iya sa kalibutan. Atua siya sa mga kapunongan ug hataas nga sosyedad, siya ug ang iyang asawa, nagalakaw diha sa dalan, nga nagapanigarilyo ug nagainom-inom ug nagahubog-hubog, sa pagpaninguha nga makakaplag og kalinaw. Ug ingon nga ania kanato ang Espiritu ni Cristo, sama niadtong atua Kini kang Abraham, mao nga ginaapas nato siya. Ingon nga dala-dala ang tibuok hinagiban sa Dios, og ang mga Anghel sa Dios nga nagapalibot kanato, nagaadto kita aron ipahibalik ang atong igsoon nga nahulog.

⁶⁹ Ug sa katapusan pag matapos na ang pagpakiggubat, mahinagbo usab nato si Melquisedec, dalaygon ang Dios, Nga nagpanalangin kang Abraham kaniadto, ug naghatag kaniya og panalangin, ug naghatag sàb kaniya og tinapay ug bino, ang komunyon. Ug pag matapos na ang pagpakiggubat, mahinagbo na nato Siya. Kita nga mga manununod sa saad nga iya ni Abraham, mga isigkamanununod uban ni Cristo sa Gingharian, pagtagboon nato Siya sa katapusan niining panaw, ug magadawat og tinapay ug bino, usab, pag matapos na ang pagpakiggubat.

⁷⁰ Kinsa man kining Si Melquisedec? “Ang Usa nga walay amahan, walay inahan, walay sinugdan sa mga adlaw o katapusan man sa kinabuhi.” Mamaatua Siya Didto aron sa paghatag og komunyon pag-usab. Nasabtan n’yo ba?

⁷¹ Sa diha nga nanagkatigum kita, sa pipila ka gabii, sa diha nga nagakahiusa kita ug nagadawat og komunyon gikan sa mga kamot sa mga ministro, nga nagarepresentar nga kita nagatoo sa pagkamatay, paglubong, ug pagkabanhaw ni Ginoong Jesus, nga ang maong tabil, ang Iyang lawas nga pinaagi niini Siya natabilan, ang Dios, ginadawat nato kini, ingon nga representasyon nga, “Kita mga patay na sa mga butang nga iya sa kalibutan, ug natawo na pag-usab sa Espiritu.” Ug nagalakaw kita uban sa Lawas ni Cristo, uban sa tanang mga magtotoo nga magkauban.

⁷² Pag matapos na ang halangdong pagpakiggubat, ug motungha kita uban ni Cristo, mosalmot kita sa komunyon uban Kaniya sa Gingharian sa Dios, pag-usab; ug mokaon sa unod, ug moinom sa dugo sa ubas pag-usab, didto sa Gingharian sa Dios. Oh! Mao kana si Melquisedec. Mao kana Siya Mao kaniadto.

⁷³ Karon mobasa kita og dugang pa mahitungod Kaniya dinhi, sa ika-18 nga bersekulo.

Ug unya si Melquisedec nga hari sa Salem mikuha og tinapay ug vino: . . . (Nasabtan n’yo ba?) . . . ug siya mao ang sacerdote sa labing labaw nga Dios.

Ug siya gipanalanginan niya, ug miingon, Dalayegon si Abraham sa Dios nga labing labaw, nga tag-iya sa mga langit ug sa yuta:

Ug siya gipanalanginan niya, . . . Ug siya gipanalanginan . . .

Ug dalayegon ang Dios nga labing labaw, nga nagtugyan sa imong mga kaaway nganha sa imong kamot. Ug si Abraham mihatag kaniya sa mga ikapulo nga bahin sa tanan.

Naghatag siya og ikapulo ngadto kang Melquisedec. Mihatag si Abraham Kaniya og ikapulo sa tanang mga inagaw niya sa gubat.

⁷⁴ Karon gusto ko nga inyong matikdan dinhi samtang nagapadayon si Pablo, ingon nga basihanan para sa sunod nga leksyon karon.

Unya ang hari sa Sodoma miingon kang Abraham, Ihatag mo kanako ang mga tawo, ug kuhaon mo alang kanimo ang bahandi.

Bueno, miingon ang hari sa Sodoma, “Karon, ibalik mo lang kanako ang akong mga tawo, ug kuhaa alang kanimo ang mga bahandi.”

Ug mitubag si Abraham sa hari sa Sodoma, Gibayaw ko ang akong kamot sa G^{INOO}, Dios nga labing labaw, . . .

El Elyon, “ang tag-iya sa mga langit ug yuta,” ingon-ana.

. . . Dios nga labing labaw, nga tag-iya sa mga langit ug yuta,

Nga ako dili mokuha bisan sa usa ka lugas nga hilo ni sa higot sa usa ka sapin, . . .

Wala siya nagpahigayon og dagkung buluhaton aron makapanapi. Ang gitinguha lang niya mao ang igsoon niya nga nahulog.

. . . ug ako dili mokuha sa tanan nga mga imo, aron nga ikaw dili makaingon, ako ang nagpadato kang Abraham:

Gawas kadto lamang mga gipangaon sa mga batan-on, ug ang bahin sa mga tawo nga ming-uban kanako, . . .

⁷⁵ Karon, gusto ko nga inyong matikdan, miingon si Abraham, “Ako dili mokuha bisan sa usa ka lugas nga hilo ni sa higot sa usa ka sapin.” Wala siya nakig-away sa gubat, aron makanapapi og daghang salapi. Ug ang matuod tinuod nga mga pagpakiggubat wala man ginabuhat para lang sa hinakog nga mga motibo. Ang mga gubat dili ginapakig-awayan para lang sa salapi. Ginapakig-awayan ang mga gubat tungod—tungod sa mga motibo, tungod sa mga prinsipyo. Ginapakig-awayan sa mga tawo ang gubat tungod sa mga prinsipyo. Ug ngani kaniadtong miadto si Abraham aron kuhaon si Lot, wala man siya miadto tungod kay nasayod siya nga mahimo ra niyang buntogon ang mga hari ug angkonon ang tanan nilang panag-iya, kondili

miadto siya tungod sa prinsipyo nga “luwason niya ang iyang igsoon.”

⁷⁶ Ug ang si kinsa mang ministro nga gikapadala ilalum sa pagdihog sa Hari sa Langit, dili pud magasangyaw alang sa salapi; dili siya magasangyaw aron magtukod og dagkung mga simbahan, ni magasangyaw siya aron dasigon ang mga denominasyon. Magasangyaw lamang siya tungod sa usa ka prinsipyo, ug kana mao, “Ang mapahibalik ang iyang igsoon nga nahulog.” Duna man siya’y makuha nga diyos sentimos sa offering o wala, wala kana’y diperensya sa iyaha.

⁷⁷ Sama sa ginaingon ko, “Ginapakig-awayan ug ginapahigayon ang tinuod nga mga gubat tungod sa mga prinsipyo ug dili tungod sa salapi.” Pero may mga kalalaken-an ug mga kababayen-an nga nagapamiyembro sa iglesia ug nagasimba, aron mamahimong inila, tungod kay miyembro dinha ang mga *Jones*, o kaha mobalhin sila og simbahan gikan sa gamay’ng simbahan ngadto sa usa ka dakung simbahan, ginabuhat ninyo kana tungod sa usa ka hinakog nga motibo ug wala sa luyo niana ang husto nga prinsipyo. Angay unta nga andam kamong mobarug diha sa natad sa panggubatan.

⁷⁸ Ngani dinhi niini nga tabernakulo, kon aduna ma’y mga problema, ug mohawa kamong mga kalalaken-an ug mga kababayen-an ug moadto sa kung asa pa man, o mopahilayo sa hangtud nga mahuman ang diyutay’ng panagbingkil o panaglantugi, nan adunay sayup sa inyong kasinatian. Oo.

⁷⁹ Aduna kita’y nabatasan dinhi. Aduna kita’y—aduna kita’y kahan-ayan dinhi. Kini nga iglesia nakabasi sa mga prinsipyo sa Biblia. Kung aduna man dinhi nga wala nagabuhat sa husto, ug sa tan-aw n’yo wala gyud sila nagabuhat sa husto, nan adto n’yo siya ug istoryaha siya. Kung dili n’yo siya mahipasig-uli, nan pag-uban og usa pa ka igsoon, usa o duha. Kung dili gihapon siya mahipasig-uli, nan isulti na kana sa iglesia. Ug papahawaon siya sa iglesia, og dili na magpakig-fellowship sa iyaha. Ug miingon si Jesus, “Unsa ma’y inyong pagaluagan sa yuta, pagaluagan Ko sa Langit.”

⁸⁰ Mao kana’y hinungdan nga daghan kaayo mo og problema, tungod kay wala man ninyo ginasunod ang mga prinsipyo sa Biblia. Kung aduna pu’y nagahinungdan og kasamok sa iglesia, o kaha aduna ma’y saypan, dili n’yo katungdanan nga moadto og hisgotan ang bahin niana nga lalaki o niana nga babaye. Kondili katungdanan n’yo nga adtoan ang maong lalaki o babaye, ug sultihan siya sa iyang sayup. Ug kung dili siya maminaw kanimo, nan pag-uban og usa pa ka tawo. Kon dili gihapon siya maminaw, nan pagaluagan na siya sa iglesia. Miingon si Jesus, “Unsa ma’y inyong pagaluagan sa yuta, pagaluagan Ko sa Langit. Unsa ma’y inyong pagabugkoson sa yuta, pagabugkoson Ko sa Langit.” Ingon-ana ang gahum sa iglesia.

⁸¹ Dinhi dili pa lang dugay, ang higala kong magwawali, aduna siya'y anak nga lalaki, ug kining batan-ong lalaki nagasimba, sa iya mismong simbahan. Miabot sa punto nga ang maong batan-ong misugod na siyang nakig-uban-uban sa usa ka batan-ong babaye nga nagapanigarilyo ug nagahubog-hubog ug kung unsa na lang ang ginabuhat. Miingon ang magwawali, "Siyempre, tulubagon gyud niya kana." Usa siya ka suod kaayo nako nga higala, ug buutan baya unta ang anak niyang batan-ong lalaki. Pero naibog gayud siya sa usa ka batan-ong babaye; ug minyo pa gyud ang maong babaye, may pipila na ka anak, og buhi pa ang iyang bana. Mao nga nabalaka ang magwawali nga basin magkaaduna sila og . . . nga minyoan niadtong batan-ong lalaki ang maong babaye. Busa, naguol kaayo kining maong igsoon. Ug miingon siya sa ako, "Igsoong Branham, gusto ko unta nga adtoan mo kining *ingon niani-ingon niana* nga anak kong lalaki. Gusto ko unta nga istoryahon mo siya."

⁸² Ingon ko, "Igsoon . . ." Hapit kong masulti ang iyang ngalan. "Aduna ma'y mas maayong paagi. Ayaw na ako paadtoa. Kung wala nagakinabuhi sa husto ang batan-ong lalaki, ug nakita sa iglesia nga sayup ang ginabuhat niya, kung ingon-ana katungdanan sa iglesia nga ipatuman kana. Anaa na kana sa iglesia. Ug angay nga moadto gyud ang iglesia ug sultihan siya."

⁸³ Busa nag-uban ang magwawali og usa pa ka igsoon, ug ilang giadtoan ug gisultihan ang batan-ong lalaki. Ug gitubag ra kono niadtong batan-on ang igsoong lalaki, nga dili kono siya angay'ng manghilabot sa uban, kay wala man pud kono siya nagapanghilabot sa uban. Mao nga ang magwawali nag-uban na usab og usa pa ka igsoon, duha diay, duha ka diyakono ang miadto sàb ug gisultihan ang batan-on. Pero wala gihapon siya maminaw. Mao nga gitug-an na gyud nila kadto sa iglesia. Ug wala na mitambong kadtong batan-on sulod sa pipila ka gabii, aron unta mahipasig-uli sa iglesia human nga gitug-an na ang iyang sala sa atubangan sa iglesia. Pagkahuman niadto, giluangan na siya sa iglesia.

⁸⁴ Ug mga usa ka bulan sukad niadto nagkasakit og pulmonya ang batan-ong lalaki, ug miingon ang doktor, "Wala na gyud siya'y paglaum nga mabuhi pa." Mao nga niadtong tungora hinay-hinay na siya nga mibalik. Nasayod gyud ang Dios kung unsaon sa pagpahibalik.

⁸⁵ Pero ginasulayan nato nga kita mismo ang mobuhat niini, "Oh, kinahanglan mong ipalagpot na si *Ingon niani-ug-ingon niana* sa iglesia. Kinahanglan mong buhaton *kini, kana, o uban pa.*" Nabuhat na ba ninyo ang inyong katungdanan bahin niana ingon nga usa ka iglesia? Mao kana. Ang paagi nga para hinay-hinay silang mapahibalik, mao ang itugyan sila ngadto sa yawa sa usa ka higayon.

⁸⁶ Unsa ma'y gisulti ni Pablo kaniadto mahitungod niadtong lalaki nga nakigpuyo-puyo sa asawa sa iyang amahan? Tungod dili man nila siya mahipasig-uli. Ang ingon, "Itugyan siya ngadto sa yawa." Tan-awa n'yo kung unsa ang nahitabo. Ug sa sunod nga sulat nga gisulat ni Pablo, naihusto gyud kadtong lalaki. Tinuod. Aduna man ang Dios og pamaagi sa pagbuhat niining mga butanga, kung tumanon lang nato ang Iyang mga lagda.

⁸⁷ Kon ugaling aduna ma'y problema sulod sa iglesia, kung mahitabo man ang ingon-ana sa taliwala sa kongregasyon, sa tagsa-tagsa sa mga kaisugan. Kon ugaling sa hunta man sa mga diyakono, nga ang usa sa inyo nga mga diyakono wala nagminatarung, nan angay nga magtigum ang ubang mga diyakono ug magpulong-pulong, sulayan n'yong ipasig-uli ang maong igsoon, sultihan siya sa kung unsay ginabuhat niya; o bisan ang usa sa inyo nga mga miyembro, kon si kinsa man. Dayon kinahanglan n'yo kining ipahayag sa atubangan niya. Kung mobalibad man siya, nan adtoi og sultihi na ang pastor. Pagkahuman, pagaluagan na siya sa iglesia, ug isipon siya nga usa ka pagano ug maniningil sa buhis. Dayon matikdi n'yo nga mamuhat ang Ginoo sa iyaha. Kita n'yo, mao kana ang higayon nga makaamgo na gyud siya. Mao kana ang higayon nga hinay-hinay na siya nga mobalik. Pero ginabuhat nato kini sa kinaugalingon natong pagpaningkamot, kabalo na mo, gapaningkamot sa pagbuhat og... ginabuhat ang tanan sa ato mismong pamaagi, bueno, dili gayud kita molampus.

⁸⁸ Karon, kining si Melquisedec, Hari sa Salem, Principe, Sacerdote sa Labing Hataas, misugat kang Abraham ug nagpanalangin kaniya. Ug mihatag Kaniya sa iyang mga ikapulo, mihatag si Abraham. Ug Siya mao ang Hari sa Salem. Ug mikuha Siya og tinapay ug bino, ang komunyong, ug gihatag kadto kang Abraham human sa pagpakiggubat, human nga nabawi na ang mga tawo.

⁸⁹ Bueno, "Ang tanang mga gubat," sa gikaingon ko na, "ginapakig-awayan kini tungod sa mga prinsipyo." Karon, kung aduna man kamo'y diyutay'ng gubat sa iglesia, nan kinahanglan nga pinasikad kana sa husto nga prinsipyo. Kinahanglan nga ang husto gyud nga butang ang inyong ginapakiglimbasogan. Ug ingon-ana ang angay'ng buhaton sa matag miyembro sa iglesia. Karon, kini nga pagtudlo para man sa iglesia. Mao kana'y hinungdan nga ania kita dinhi. Mao kana'y hinungdan nga nagatindog ako dinhi. Mao kana kon para sa asa ang Pulong sa Dios, para sa iglesia.

⁹⁰ Ayaw gayud ninyo tugoti nga may unsa man nga magababag niining iglesia. Kung aduna man, nan may tulubagon kamo, ang matag usa kaninyo. Ug kamo, sa inyong nagkadaiyang iglesia, kung aduna ma'y dili na maayo sa inyong iglesia, nan may tulubagon kamo, tungod kay kamo man ang tagbantay

sa niana nga iglesia. Dili na kana katungdanan sa pastor. Dili na kana katungdanan sa hunta sa mga diyakono. Inyo kanang katungdanan, sa tagsa-tagsa mismo, nga adtoan kana nga igsoon ug tan-awon kung mahipasig-uli ba ninyo siya. Kung dili man, nan pag-uban og duha o tulo pa ka tawo, dayon baliki siya. Kon dili siya maminaw, isulti n'yo na sa iglesia. Dayon papahawaon na siya sa Gingharian sa Dios. Miingon ang Dios, “Kung papahawaon n'yo siya dinha, papahawaon Ko siya Dinhi, kung sundon n'yo lang kini nga lagda.” Dayon buhian Niya ang yawa nganha sa iyaha para sa pagbuhat. . . paglaglag sa iyang unod. Ug kung ingon-ana mobalik na siya. Husto kana. Mao kana ang paagi para mapahibalik siya. Kung anak man siya sa Dios, nan mobalik gyud siya. Pero kung dili, aba—aba, magapadayon ra siya, ug nianang higayona dalhon siya sa yawa ngadto iyang Eternal nga dapit.

⁹¹ Bueno, may mga motibo pud niana. Kung buhaton mo kana tungod sa usa ka tawo, nan lahi na kana. Gawas, kung sad-an gyud ang maong tawo! Ug didto si Lot mipuyo ug nag-backslide, bisan pa nga usa siya ka Hebreohanon. Didto siya mipuyo ug nag-backslide. Anaa man siya sa grasya, apan nahulog siya gikan niini. Ug sa paggawas niya. . . Ug si Lot—si Lot luwas man siya. Mao nga ayaw mo paghunahuna nga si Lot dili luwas. Luwas siya. Tungod kay, sa tibuok panahon kaniadtong atua siya sa sayup nga dapit, ang Biblia miingon, nga, “Ginasakit sa mga kasal-anan sa Sodoma ang iyang matarung nga kalag matag adlaw.” Pero, lahi ang ginabuhat sa iyang unod. Ug unsa ma'y iyang katapusan? Nagdala siya og mas grabe nga kaulawan. Ang iyang asawa nahimong haligi nga asin. Nakabaton si Lot og mga anak sa iyang mga anak nga babaye. Busa, makita n'yo kung unsa ka dakung kaulawan ang gidala niadto, tungod nga nahulog siya gikan sa grasya ug wala na napasig-uli ang iyang kaugalingon. Ug mao nga gikinahanglan kuhaon na siya sa Dios gikan sa yuta.

⁹² Apan, bisan pa niana, siya usa gihapon ka igsoon nga nahulog, ug gibuhat ni Abraham ang tanan nga mahimo niya aron mapahibalik siya. Ug ang Espiritu nga anaa kang Abraham kaniadto, mao ang Espiritu ni Cristo nga ania sa iglesia sa karong panahon. Bisana unsa pa'y nabuhat sa igsoon, buhaton mo ang tanan nga mahimo mo aron mapahibalik siya sa pagpakig-fellowship kang Cristo. Bisana unsa pa'y iyang nabuhat, maningkamot gyud ka.

⁹³ Karon, gusto natong matikdan dinhi pag-usab, samtang magapadayon kita niini nga leksyon mahitungod niining si Melquisedec, kining halangdong Sacerdote sa Salem, ug ang tag-iyay sa Kalangitan ug sa yuta. Karon, una sa tanan:

*Walay amahan, walay inahan, walay kagikanan,
walay sinugdan sa mga adlaw, ni katapusan sa*

kinabuhi; kondili nga gibuhat nga sama sa Anak sa Dios; nagapadayon nga sacerdote hangtud sa kahangturan.

Karon matikdi n'yo. Dili Siya ang Anak sa Dios, Siya mao ang Dios sa Anak. Dili Siya ang Anak sa Dios, dili si Melquisedec, kondili Siya mao ang Amahan sa Anak sa Dios.

⁹⁴ Bueno, kadtong lawas Niya kaniadto, Iya kadtong gilalang. Wala kadto gihimugso sa usa ka babaye. Busa tungod niadtong gilalang nga lawas, dili Niya mahimong. . . Usa ka lawas nga Iyang gibuhat, Mismo, aron ipadayag ang Iyang Kaugalingon.

“Wala pa’y tawo nga nakakita sa Dios. Ang Dios espiritu.” Dili man makita sa mortal nga mga mata ang ingon-anang mga butang, gawas kon anaa kini sa usa ka porma nga Haliging Kalayo, o unsa man, o sa porma sa usa ka linalang nga makita nila pinaagi sa pagtan-aw. Apan ang. . . kinahanglan nga ipadayag sa Dios ang Iyang Kaugalingon pinaagi sa usa ka pamaagi. Ug gipadayag sa Dios ang Iyang Kaugalingon kang Abraham, sa porma sa usa ka tawo. Gipadayag Niya ang Iyang Kaugalingon kang Moises, sa porma sa usa ka tawo. Gipadayag Niya ang Iyang Kaugalingon ngadto sa mga anak sa Israel, diha sa porma nga usa ka Haliging Kalayo. Gipadayag Niya ang Iyang Kaugalingon kang Juan Bautista, diha sa porma sa usa ka salampati. Nakita n'yo, gipadayag Niya ang Iyang Kaugalingon sa ingon-ana nga mga porma.

Sa diha nga gipadayag sàb Niya ang Iyang Kaugalingon sa porma sa usa ka Tawo, ingon nga Hari sa Salem; sa Jerusalem; dili nga yutan-ong Jerusalem, kondili Langitnong Jerusalem. Gipadayag Niya ang Iyang Kaugalingon sa ingon-adto nga porma. Gibuhat Siya nga “sama sa” Anak sa Dios.

⁹⁵ Bueno, ang Anak sa Dios kinahanglan nga moabot pinaagi sa usa ka babaye, nga pagalalangon dinhi; pinaagi sa tagoangkan sa usa ka babaye, tungod kay pinaagi sa mao ra nga porma nagaabot ang kamatayon.

⁹⁶ Ug dili Siya puedeng moabot pinaagi sa paglalang nga sama sa gibuhat sa Dios sa sinugdanan kaniadto. Sa dihang gibuhat sa Dios ang tawo sa sinugdanan, walay unsa man nga kahilambigitan niadtong ang babaye. Miingon lang ang Dios, “Magkaaduna,” ug mitungha ang lalaki gikan sa abog. Gitawag Niya ang lalaki, nga wala na nagkinahanglan og kinsa mang babaye. Pero, ang babaye, atua na kaniadto sa lalaki.

⁹⁷ Ug gikuha sa Dios ang babaye gikan sa kilid ni Adan. Husto ba kana? Ug dayon mitungha ang babaye ug naghimugso og tawo pinaagi sa pagpakighilawas. Busa ang bugtong paagi nga mahimo sa Dios. . . Dili man Siya puedeng moabot ingon nga theophany. Dili pud Siya puedeng moabot ingon nga si Melquisedec. Kinahanglan moabot Siya ingon nga usa ka Tawo, ug mao nga gikinahanglan Niyang moabot pinaagi sa babaye. “Ang imong Binhi magasamad sa ulo sa serpente, ug ang

iyang ulo ang magasamad sa Imong tikod.” Nasabtan n’yo ba? Kinahanglan nga moabot ang Dios pinaagi sa usa ka babaye; ug miabot Siya, sa dihang mipuyo Siya sa Iyang lawas sa Iyang Anak, nga si Jesus Cristo. “Ang Dios diha kang Cristo, nagapasig-uli sa kalibutan ngadto sa Iyang Kaugalingon.” Ug gihalad Niya ang Kaugalingon Niyang Dugo ingon nga usa ka halad. Ug gihatag ang Iyang Kinabuhi, aron nga pinaagi sa instrumento nga mao ang kamatayon, maluwas Niya kamo paingon ngadto sa Kinabuhing Walay Katapusan.

⁹⁸ Busa miabot ang Dios kaniadto, ug gibuhat Siya nga “sama sa” Anak sa Dios. Kita n’yo? Usa Siya ka Tawo nga gibuhat nga *sama* sa Anak sa Dios. Mao nga, dili Siya mahimong mao ang Anak sa Dios, tungod kay kini nga Tawo Eternal man.

⁹⁹ Ang Anak sa Dios aduna ma’y sinugdanan, aduna pud Siya’y katapusan. Aduna Siya og—og panahon sa Iyang pagkahimugso, aduna pud Siya’y panahon sa Iyang pagkamatay. Siya’y parehong adunay sinugdanan ug katapusan. Siya’y parehong adunay amahan ug inahan.

¹⁰⁰ Pero kini nga Tawo walay amahan ni inahan, ni sinugdanan o katapusan man sa panahon. Apan gibuhat Siya, kining Tawong, si Melquisedec, gibuhat nga *sama* sa Anak sa Dios.

¹⁰¹ Bueno, ang Anak sa Dios, sa dihang mianhi Siya sa kalibutan, diha sa porma sa usa ka babaye, o, pinaagi sa usa ka babaye, sa porma sa tawo, ug gipatay, gibanhaw sa ikatulo nga adlaw, nabanhaw alang sa pagpamatarung kanato, og karon nagapadayon Siya hangtud sa kahangturan. Ug basta nagapadayon kana nga lawas, nan kita usab magapadayon. Ug tungod kay mibangon Siya gikan sa abog, pagabanhawon sàb kita nga sama sa Iyang porma. Mao kana ang estorya sa Ebanghelyo. Dalaygon ang Ngalan sa Ginoo. Dili nga mga Manulonda, dili supernatural nga mga linalang, dili sa kung unsang panon nga may balahibo, kondili mga kalalaken—an ug mga kababayen—an, amen, nga mamahimong sama na sa Iyang porma. Oo, sir.

¹⁰² Sama sa kanunay ko nang ginaingon, isulti ko kini dinhi pag-usab karon. Mora’g angay ra man kini isulti. Ginasudlay ko kaniadto, kadtong mga lima o unom na lang ka buhok nga nahibilin kanako. Ug miingon ang akong asawa, “Billy, nagakaupaw na gyud ka.”

¹⁰³ Ingon ko, “Apan wala gyud ko nawad-an ni usa niini.”

¹⁰⁴ Ingon siya, “Nan asa na man ang mga niini?”

¹⁰⁵ Ingon ko, “Sultihi ako kung asa ba ang mga niini sa wala pa ako nagkaaduna niini, og isulti ko kanimo kung asa ang mga niini nagahulat para kanako.” Husto kana.

¹⁰⁶ Usa—usa ako ka boksingero kaniadto, manunumbag. Kusgan ako kaniadto ug daku. Ug sa hunahuna gud nako, kung ibutang

n'yo kining simbahan nganhi sa akong likod, mahimo nakong molakaw nga ginapas-an kini. Pero sultihan ko kamo, sa karon pag mobangon ako matag buntag, naamgo ko nga halos kuwarenta ka tuig na man diay ang milabay. Kita n'yo? Dili na ako sama sa kung unsa ako kaniadto. Nagakaluya na ako, matag adlaw. Samtang ginatan-aw ko ang akong mga kamot ug mahununahuna ko, "Tan-awa gani. Bueno, nagakatigulang na gyud ako." Kon tan-awon ko ang akong mga abaga. Makita ko nga midaku na gyud ang akong timbang. Ngani kaniadto baynte-otso ra man ang sukod sa bakus nga akong ginasul-ob. Pero karon traynta na ang sukod sa akong ginasul-ob. Kita n'yo, nagakatigulang na gyud ko, mitambok na, og nagakaluya na.

¹⁰⁷ Unsa man kini? Mao ra man gihapon ang akong ginakaon sama kaniadto. Mas limpyo ug mas arang-arang pa gani ang akong pagpuyo karon kaysa kaniadto, mao gihapon. Apan nagtakda na man ang Dios og panahon para kanako, ug kinahanglan kong madawat kini. Pero ang mapanalanginong hunahuna, nga, sa nianang adlaw, pagabanhawon Niya ako. Ug ang tanan kung unsa ako kaniadto baynte-singko anyos pa ako, mamaingon gyud niana ako pag-usab hangtud na sa kahangturan. Amen. Mao kana. Unsa ma'y akong kabalak-an sa pagkatigulang? Dinha ko gibuntog ang yawa sulod sa daghang mga katuigan, ingon nga nahibalo, nga ako nagatoo sa Dios. Kining gidugayon sa panahon diyutay ra, og hamubo ra gyud, bisan pa man. Kung magpabilin man kita dinhi og kan-uman ug napulo, setenta'y anyos, ingon nga mao'y gikasaad nga panahon para kanato, unsa—unsa man kana kondili puro ra'y kasakit ug kagul-anan? Unsa man kini? Mahimo ba ninyong ibaylo kini nga pesthouse alang nianang mahimayaong butang sa unahan?

¹⁰⁸ Aba, dalaygon ang Ngalan sa Ginoo! May sa kung unsang butang sa kinasuloran ko nga mitagbo nianang si Melquisedec usa niadto ka adlaw, ug nagsulti Siya og pakigdait nganhi kanako ug gihatagan Niya ako og Kinabuhing Walay Katapusan. Ug wala na'y kapuslanan kining kinabuhia gawas lamang nga usa ka tabernakulo kon diin ang Maayong Balita igawali. Ginasulti ko kini nga may bug-os nga pagkasinsero, samtang nakaabli kining duha ka Biblia sa atubangan ko. Kung ang akong Dios nahuman na sa ako para sa pagpangwali sa Maayong Balita, ug dili na ako makabuhat pa para Kaniya, nga ang akong mga anak usab igo na ang pangidaron nga maatiman na nila ang ilang mga kaugalingon, ug kon gusto na Niya akong kuhaon karon dayon, "Amen," nan mao na gyud kana. Oo, sir.

¹⁰⁹ Unsa ma'y kalahian niana kung otsenta na ako o kung baynte pa ako? Basta ania lamang ako alang sa usa ka butang: ang alagaran ang Ginoo. Kana lang. Kung mahimo ko sa gihapon nga iwali ang Maayong Balita sama sa ginabuhat ko karon, pag otsenta na ako, nan unsa ba'y kalahian kung kuwarenta pa ako o otsenta na? Daghang tawo karong gabhiona nga otsenta anyos

na ang panuigon. Ug daghang mga bata usab ang mas mauna pang mamatay, kay sa usa ka tigulang nga lalaki nga otsenta'y anyos na ang panuigon, kadaghanan kanila. Mao nga unsa ba'y kalahian? Nagadepende ra sa inyong mga motibo, sa inyong mga prinsipyo, ug ania kita aron alagaran ang Ginoong Jesus. Kana lang.

¹¹⁰ Nanghibalo man tà, nga, “Kining kinabuhia sama lang sa usa ka inalisngaw nga ginaingon sa usa ka tawo; nga sa makadiyut magapadayag, ug sa ulahi mahanaw lamang.” Apan kung aduna kita'y Kinabuhing Walay Katapusan, nagsaad ang Dios nga pagabanhawon Niya kita. Ug magaaambit kita sa komunyong kauban Siya pag matapos na ang mga adlaw, ug pag moingon na Siya, “Sumulod ka sa kalipayan sa Ginoo, nga dugay nang giandam para kanimo sukad pa sa pagkatukod sa kalibutan.”

¹¹¹ Busa unsa ma'y kalahian niana, kung aduna ma'y atoa o wala? Kung batan-on man kita o kung tigulang na, unsa ba'y kalahian niana? Ang pinakamahinungdanong butang baya, andam na ba kamong tagboon Siya? Gihigugma n'yo ba Siya? Mahimo n'yo ba nga alagaran Siya? Gisalikway n'yo na ba ang mga butang sa kalibutan? Nahinagbo n'yo na ba si Melquisedec sukad niadtong natapos ang pagpakiggubat?

¹¹² Dalaygon ang Dios! Mga baynte-uno anyos pa ako, kaniadto, ug usa niadto ka adlaw nagapanglimbasog ako bahin *niini, niana, o uban pa*. Dili ako makapagdesisyon kung gusto ko ba mahimong boksingero, o kung gusto ko ba mahimong usa ka tiglit-ag og mga hayop, o mangangayam, o kung unsa ba gyud ang gusto ko. Apan nahinagbo ko si Melquisedec, ug gihatagan Niya ako og komunyong, ug sukad niadto napahiluna na gyud kadto hangtud na sa kahangturan. Alleluyah! Anaa na ako sa Iyang kiliran. Nagakalipay na ako sa panaw. Ug pag modangat na ako sa katapusan niining panaw, ug direkta nang motutok kanako ang kamatayon, sama sa mabati ko karon, dili na gyud ako mahadlok niana. Molakaw ako, gusto kong molakaw sa atubangan niana mismo, nga nasayod, nga maila ko Siya Nga mao'y nagsaad, husto kana, nga maila ko Siya sa gahum sa Iyang pagkabanhaw. Sa dihang manawag na Siya sa taliwala sa mga patay, mobangon ako gikan sa taliwala nila. Husto, ingon nga maila ko Siya sa gahum sa Iyang pagkabanhaw. Unsa ma'y kalahian niana, kung tigulang na ako o kung batan-on pa? Kung gamay man ako o daku? Kung busog man ako o gutom? Kung aduna man ako'y luna nga mapahimutangang o wala?

¹¹³ “Ang mga langgam adunay mga salag, ug ang milo adunay lungib, apan ang Anak sa tawo walay ni usa ka luna nga mapatongan sa Iyang ulo,” apan Siya mao ang Hari sa Himaya.

¹¹⁴ Mga hari ug mga sacerdote kita karong gabhiona. Unsa ba'y kalahian kung aduna kita o wala? Basta anaa kanato ang Dios, kita labaw pa ka mga mananaug. Kita labaw pa

gyud ka mga mananaug. Ingon nga anaa kita sa Presensiya sa Dios, sa pagpakig-fellowship sa Balaang Espiritu, nagaambit sa Espirituhanong komunyong nga nagagikan sa mga kamot Niya nga nagpamatuod, “Ako Mao ang namatay, ug nabuhi pag-usab, ug buhi Ako hangtud sa kahangturan.” Nagalingkod na kita sa Langitnong mga dapit diha kang Cristo Jesus. Oh, dalaygon ang Iyang Balaan nga Ngalan! Unsa ba’y kalahian niini?

Usa man ka balongbalong o usa ka payag,
nganong mabalaka man ko?

Sila nagatukod man og palasyo para kanako
Didto!

Nga gama sa mga ruby ug mga diyamante, ug
pilak ug bulawan,

Puno gayud ang Iyang mga kaban, dili-maihap
ang Iyang mga bahandi.

115 Nahinagbo ko Siya usa ka adlaw niadtong gikan ako sa pagpakiggubat. Gibutang ko ang akong mga tropeyo. Wala na ako’y gipakig-awayan sukad kaniadto; Siya na man mismo ang nagapakig-away para sa ako. Nagasalig lamang ako sa Iyang saad, nga nahibalo, nga maila ko Siya sa gahum sa Iyang pagkabanhaw. Mao lang kana ang importante. Unsa pa ba’y mas importante?

116 Unsa ma’y mahimo nato? Ang pagkabalaka ba makadugang og usa ka maniko sa imong katas-on? Unsa man diay kung kulong ang imong buhok, o kung aduna ka pa’y buhok o wala na? Unsa ma’y kalahian niana? Kung tigulang ka na, kung ubanon ka man, kung nagtikubo na ang imong abaga, o kung wala pa, unsa ma’y kalahian niana? Amen. Diriyut lamang kini, hamubo ra nga panahon, apan Kana mao’y hangtud sa kahangturan ug hangtud sa kahangturan. Ug bisan hataas man kaayo nga panahon ang magaabot pa, molabay man ang mga kapanahonan, dili gayud kamo mausab, ug hangtud na kamo sa Iyang Eternal nga mga kapanahonan nga walay katapusan. Nan unsa ma’y kalahian?

117 Malipayon kaayo ako nga nahinagbo ko Siya. Malipayon kaayo ko nga gihatagan Niya ako og komunyong, usa ka adlaw, niadtong mao ra mismo nga Melquisedec nga misugat kang Abraham nga gikan kaniadto sa pagpamatay sa mga hari. Mao gayud. “Ang Dios sa Langit,” ang *El Elyon*; ang gamhanang “MAO NA AKO,” dili ang Ako kaniadto; MAO NA AKO, pang-karon. “Ug Iyang gipanalanginan siya.”

118 Paminaw mo samtang magbasa pa kita og dugang dinhi, aron atong masabtan pa og diyutay ang leksyon. Karon sa ika-4 nga bersekulo.

*Karon palandunga kung unsa ang pagkadaku niining
tauwahana, . . .*

Nahunahuna ko kana, usab. “Palandunga n’yo kung unsa ang pagkadaku niini nga Tawo.” Siya’y labaw pa gayud sa Anak

sa Dios. Ang Anak sa Dios adunay amahan ug inahan; pero Siya wala. Ang Anak sa Dios adunay sinugdan sa panahon ug katapusan sa panahon; pero Siya wala. Kinsa man kadto? Kadto mao ang Amahan sa Anak. Siya Mao Kadto.

. . . palandunga kung unsa ang pagkadaku niining tawohana, nga . . . bisan gani si Abraham nga patriarca naghatag sa ikapulo sa mga labing maayo sa tanang mga inagaw.

119 Karon paminaw mo og ayo.

Ug kadtong sa mga anak ni Levi, nga nanagdawat sa katungdanan sa pagkasacerdote, may . . . sugo sa pagkuha sa mga ikapulo gikan sa mga tawo sumala sa kasugoan, nga, gikan sa ilang mga igsoon, bisan naggikan kini sila sa mga hawak ni Abraham:

120 Karon matikdi n'yo kini kung gusto n'yong makakita og usa ka butang.

Apan siya kang kinsang kagikanan wala gipadayon . . . gikan kanila nagkuha sa mga ikapulo gikan kang Abraham, ug nagapanalangin kaniya nga nagbaton sa saad.

121 Nabatonan ni Abraham ang maong saad, ug gipanalanginan niini nga Tawo si Abraham nga nagbaton sa saad. Kinsa man kini? Ang mga anak ni Levi nagbayad og ikapulo ngadto sa ilang mga kaigsoonan o . . . Ang ilang mga kaigsoonan nagbayad og ikapulo ngadto kanila. Adunay sugo kanila ang Ginoo sa pagkuha sa ikapulo nga bahin sa kinitaan sa ilang mga igsoon, ingon nga ilang panginabuhian, tungod kay mga sacerdote man sila. Karon, ginapahayag niana ang pagka-sacerdote ni Melquisedec, sama sa inyong ginaingon, dinha. Husto kana. Apan kini nga Tawo . . . Bisan ang mismong nagbaton sa saad, ang pinakahalangdon nga tawo sa yuta, si Abraham, nahinagbo niya kini nga Tawo ug nagbayad siya og ikapulo ngadto Kaniya. [Blangko nga bahin sa teyp—Ed.] Mao nga mas labing halangdon gyud Siya.

122 Paminaw mo.

Apan sa walay bisan unsa nga paglalis ang labing ubos gipanalanginan sa labing labaw.

Mao gayud. Matikdi n'yo kung Kinsa Siya.

Ug dinhi ang mga tawo nga mamatay nagadawat sa mga ikapulo; . . .

Ingon niana ang pagka-sacerdote sa laray sa mga sacerdote ug mga magwawali, ug uban pa. Mga lalaki nga nagadawat og ikapulo, nga mamatay. Kita n'yo?

. . . apan dinhi ginadawat kini, niadtong usa nga gipanghimatud-an nga siya buhi.

123 Para sa unsa man nga mokuha og ikapulo ang usa ka tawo, kung aduna man siya'y. . . Kung wala man siya gipakatawo, ug dili gayud mamatay, ug anaa na gikan pa sa sinugdan hangtud sa katapusan, ug—ug walay amahan o inahan o kagikanan man, ug tag-iya pa sa tibuok Kalangitan ug yuta ug sa tanan nga anaa niini, nganong kinahanglan pa man niyang mokuha og ikapulo? Nganong gibungat pa man niya kang Abraham nga magbayad og ikapulo? Nakita n'yo na kung unsa gayud ka estriktong butang ang pagbayad og ikapulo? Ang paghatag og ikapulo husto man. Mao nga obligado ang matag Cristohanon nga magbayad og ikapulo. Husto kana. Wala gyud kana sukad-sukad nausab.

124 Karon:

Ug ikaingon man gani nga, bisan si Levi, nga nagdawat sa ikapulo, mihatag sa ikapulo pinaagi kang Abraham.

125 Karon, oh, ania ang usa ka butang.

Kay didto pa siya sa mga hawak sa iyang amahan, sa gisugat siya ni Melquisedec.

126 Unsa man diay? Si Levi? Si Abraham mao ang apohan sa tuhod ni Levi. Ug ang ingon dinhi sa Biblia, nga, “Si Levi nagbayad na og ikapulo samtang atua pa siya sa mga bat-ang ni Abraham.” Upat pa ka kaliwatan adisir siya nahitungha dinhi sa yuta, nagbayad na siya og ikapulo ngadto kang Melquisedec. Dalaygon ang Ngalan sa Ginoo!

127 Unya, kamo nga dili makatoo sa pagpili-nang-daan, o pagtagana-nang-daan; gani ania, nga upat pa ka kaliwatan adisir mitungha si Levi gikan sa mga bat-ang ni Abraham, nagbayad na siya og ikapulo ngadto kang Melquisedec. Unta aduna pa kita'y oras para subayon kini diha sa Kasulatan.

128 Kung basahon n'yo pananglitan ang Jeremias 1:4, miingon ang Dios, “Naila Ko na ikaw sa wala Ko pa ikaw buhata diha sa tagoangkan sa imong inahan. Ug gibalaan Ko na ikaw ug gitagana ka nang daan nga propeta sa mga nasud.” Kung ingon-niana unsa ma'y masulti n'yo nga inyong nabuhat? Unsa ma'y masulti nako nga akong nabuhat? Tungod ra gyud sa Dios nga nagapakita og kalooy. Naila na kita sa Dios sa wala pa man ang pagkatukod sa kalibutan.

129 Wala Siya magtinguha nga adunay mahanaw. Wala gayud. Apan kung Dios Siya, nan hingsayran na Niya kung kinsa ang maluwas ug kung kinsa ang dili maluwas, kay kon dili nan wala gyud Siya'y unsa man nga nasayran. Kung wala Siya masayod. . . Kung wala Siya masayod kung si kinsa ang mahiuban sa Pagsakgaw, sa wala pa maporma ang kalibutan kaniadto, nan dili Siya Dios. Pero ingon nga Siya walay-kinutoban, Iyang. . . hingsayran na Niya ang matag pulgas, matag langaw, matag kuto, matag pulgas, nga maanaa sa yuta, sa wala pa man maporma ang yuta. Husto. Hingsayran na Niya ang

tanang mga butang. Sa wala pa ang pagkatukod sa kalibutan, naila na Niya kita. Miingon ang Biblia, nga, “Naila na Niya kita ug gipili-nang-daan kita.”

¹³⁰ Ato na kining klarohon karon. Balikan sa nato ang Mga Taga-Efeso, sa unang kapitulo. Sa ika-5 nga kap- . . . Sa unang kapitulo sa Mga Taga-Efeso, sa makadiyut lang. Gusto kong mobasa dinhi sa makadiyut, aron nga masabtan gayud ninyo nga dili lang kini usa ka butang nga ginapaningkamotan kong isulti kaninyo. Kondili butang kini nga ang Dios gyud mismo ang nagasulti niini sa inyo. Kita n’yo? Karon paminawa n’yo kini, og ayo, unang kapitulo sa Mga Taga-Efeso.

Si Pablo, apostol ni Jesus Cristo pinaagi sa kabubut-on sa Dios, . . .

Ang mao ra nga tawo nga nagsulat og sulat para sa mga Hebreohanon, mao usab ang nagsulat niini nga sulat.

. . . alang sa mga balaan . . .

Dili kini para sa mga dili-magtotoo, kondili para sa mga balaan, ang mga gipaba- . . . ang maong mga balaan.

. . . nga anaa sa Efeso, ug sa mga kasaligan diha kang Cristo Jesus:

Kaninyo maanaa ang grasya, ug pakigdait, nga gikan sa Dios nga atong Amahan, ug gikan sa Ginoong Jesus Cristo.

Delaygon ang Dios ug Amahan sa atong Ginoong Jesus Cristo, nga nagpanalangin kanato sa tanang panalangin nga espirituhanon diha sa mga langitnong dapit . . .

“Ingon nga Siya . . .” Bueno, paminaw mo og ayo karon, sa ika-4 nga bersekulo.

Ingon nga siya nagpili kanato diha kaniya sa wala pa ang pagtukod sa kalibutan, . . .

Kinsa man kanang “kanato” dinha? Ang Iglesia.

. . . siya nagpili kanato diha kaniya (kang Cristo) sa wala pa ang pagtukod, sa yuta, aron kita mahimong balaan ug walay ikasaway sa iyang atubangan diha sa gugma:

Kita iyang gipili-nang-daan ngadto sa pagkahimong mga anak nga sinagop pinaagi kang Jesus Cristo ngadto sa iyang kaugalingon, sumala sa Kaugalingon Niyang maayo nga katuyoan sa iyang kabubut-on,

¹³¹ Kinsa ma’y nagbuhat niini? Ang Dios ang nagbuhat niini. Hingsayran na sa Dios gikan pa sa sinugdan kung kinsa ang maluwas ug kung kinsa ang dili maluwas. Tinuod gayud, Siya wala magtinguha nga may si bisan kinsa nga malaglag. Pero wala Niya gipadala dinhi si Jesus para lang hibaloon kung kamo’y—

kamo'y manglihok ba nga ingon-ani, "Bueno, makaluluoy nga Jesus, naluoy gyud ako sa Iyaha. Mas maayo siguro kung magpaluwas na lang ko ug mouyon." Dili, sir.

¹³² Hingsayran na sa Dios sa sinugdan kung kinsa ang mga maluwas ug kung kinsa ang dili maluwas. Busa, ingon nga, hingsayran na Niya nga aduna gyu'y mga maluwas, mao nga gipadala Niya si Jesus aron mohimo og halad-pasig-uli alang niadtong mga Iyang giila-nang-daan. "Kay kadtong Iyang mga giila-nang-daan, Iyang gitawag. Ug kadtong Iyang mga gitawag, Iyang gimatarung. Ug kadtong Iyang mga gimatarung, Iya nang (human na) gihimaya." Mao kana.

¹³³ Busa dili kamo ang nagapapadayon sa inyong kaugalingon, kondili ang grasya sa Dios gayud ang nagapapadayon kaninyo. Dili kamo ang nagluwas sa inyong kaugalingon, o wala kamo'y nabuhat para mahimong takus nga maluwas. Ang grasya ra gyud sa Dios ang nagluwas kaninyo. Ang grasya sa Dios ang nagtawag kaninyo. Giila na kamo sa pagkahibalo-nang-daan sa Dios. Hingsayran na Niya nga maania kamo dinhi niini nga simbahan karong gabhiona, bisan sa wala pa kaniadto napahimutang ang pundasyon sa kalibutan, ingon nga Siya walay-kinutoban. Kay kung dili Siya ingon-ana, nan dili Siya Dios. Kung hingsayran Niya ang tanang mga butang, nan Siya'y Dios gayud. Pero kung wala Siya masayod sa tanang mga butang, nan dili Siya Dios. Kung Siya'y Dios nga Makagagahum-sa-tanan, nan mahimo Niya ang tanang mga butang. Kung dili man Niya mahimo ang tanang mga butang, nan dili Siya Dios nga Makagagahum-sa-tanan. Ingon-ana.

¹³⁴ Busa unsaon man ninyo pagpakaingon nga kini'y usa ka butang nga arang n'yong mahimo? Wala gyud kamo'y arang nga mabuhat. Tungod ra gyud kini sa gugma ug grasya sa Dios para kaninyo, bisan ang inyong pagkaania karon. Wala gyud kamo'y arang nga mabuhat, gitawag kamo sa Dios pinaagi sa Iyang grasya; naminaw kamo, nagpatalinghug, og midawat.

¹³⁵ "Bueno," moingon mo, "Igsoong Branham, gawasnon ra diay kaayo kung ingon-ana." Tinuod gayud. Gawasnon na kamo. "Bueno, mabuhat ra diay niana nga tawo ang unsa mang butang nga gustohon niya." Sigurado gayud. Sa kanunay mabuhat man nako kung unsa ang gusto nakong buhaton. Pero kung usa ikaw ka Cristohanon, dili gyud nimo gustong mobuhat og sayup.

¹³⁶ May usa ka gamay'ng babaye nga anaa dinha sa luyo karong gabhiona, ang akong asawa. Gihigugma ko gayud siya uban sa tanan nga anaa kanako. Ug bisan pang nasayod ko nga puede kong mokuyog-kuyog sa ubang babaye ug makalusot ra niana, ug sultihan siya, ug moingon, "Meda, nakabuhat ko og sayup," sa hunahuna n'yo ba buhaton ko kana? Kung tinuod ko man siya nga gihigugma, dili ko gayud buhaton kana. Tinuod.

¹³⁷ Karon, unsa pud kaha kung moingon ako, “Oh, dili ko mabuhat kana. Tungod kay, sultihan ko kamo kung ngano. Basin iya akong bulagan, ug aduna ako’y. . . Oh, usa baya ako ka magwawali. Nakita n’yo ba kung unsay mahitabo? Mapahawa ako sa pulpito tungod niana, kung iya akong bulagan. ‘Usa na ka diborsyado nga lalaki, oh!’ Duna pa gyud ko’y tulo ka mga anak; dili ko arang mahunahuna ang ingon-ana. Tungod, grabe, akong. . .”? Bueno, kung ingon niana man, nan legalista diay ka gihapon. Dili man tungod sa pagka-legalista mao nga ako siyang giminyoan. Dili pud tungod sa pagka-legalista mao nga nagakinabuhi ako nga matitud-anon sa iyaha. Kondili tungod gayud kay gihigugma ko siya. Dili nako kinahanglan nga mobuhat og bisan unsa. Matugtanon kong ginabuhat kana tungod kay usa man kini ka paghigugma sa usa’g usa. Ug kung gihigugma n’yo ang inyong asawa, mao ra usab ang buhaton ninyo.

¹³⁸ Ug kung gihigugma n’yo ang inyong asawa nga ingon niana, sa gugmang *phileo*, unsa pa kaha ang paghigugma n’yo para kang Cristo sa gugmang *agapao*, nga milyon ka pilo nga mas lig-on, kung gihigugma gayud ninyo ang Dios? Bisan pang nasayod ko karong gabhiona nga puede akong mogawas ug maghubog-hubog, bisan pang nasayod ko karong gabhiona nga puede akong magbagdoy-bagdoy ug mamahimong imoral, bisan pang nasayod ko, karong gabhiona; bisan pang anaa sa akong kasingkasing nga buhaton ang ingon-ana, ug mogawas ako ug buhaton kana, ingon nga nasayod nga pasayloon Niya ako, dili ko gyud gihapon buhaton kana. Tungod hataas kaayo ang pagtahud ko Kaniya. Gihigugma ko Siya. Sigurado gayud. Walay pagduhaduha.

¹³⁹ Mao kana’y hinungdan nga dili ko ibaligya ang akong kasinatian sa bisan unsa man nga denominasyon, (dili, sir), dili sa Assemblies of God, dili sa Church of God, dili sa Pilgrim Holiness, Methodist man, Baptist, Presbyterian, Katoliko. Dili ko dawaton ang unsa mang butang nga mahimong ihanyag, isip baylo niini nga kasinatian. Tungod kay, dili man kini sa tawo naggikan. Naggikan kini sa Dios mismo. Mao nga dili gyud, sir. Dili ko gayud ibaligya ang akong pagkapanganay isip baylo sa rock-and-roll ni Elvis Presley, o sa panon sa mga Katoliko, o sa iyang, mga Cadillac, o sa iyang minilyon nga dolyares, ug sa uban pa, nga kita niya matag bulan. Dili, sir. Gihigugma ko Siya. Ug kung ako. . . Basta ginahigugma ko Siya nga ingon niana, magpabilin ako nga matitud-anon Kaniya. Ug ingon nga gitawag ako sa Dios ug gipili ako, aduna Siya’y gipahimutang sa kinasuloran ko, ug gihigugma ko Siya.

¹⁴⁰ Nahinumduman ko hinoon si Mr. Isler. Nakaila man mo sa iyaha, kadaghanan sa inyo. Nakatambong na siya dinhi mismo, ang senador sa estado sa Indiana; mianhi, og nagtugtog og gitara. Kaniadtong namatay ang akong bata, namatay ang akong

asawa, ug napahimutang na sila didto sa lubnganan. Ug sa nagalakaw ako niadto sa dalan, nga ang akong mga kamot anaa sa akong likod, og nagahilak ko. Migawas siya gikan sa iyang gamay'ng, karaan nga trak, ug miduol og giagbayan ako, miingon, "Billy, aduna ko'y gustong ipangutana kanimo." Miingon, "Nadungog ko na ikaw nga nagwali hangtud nga halos mahulog na gani ka sa pulpito. Nadungog ko na ikaw diha sa mga kanto ug tanan na, nagasinggit para kang Cristo." Ingon pa, "Karon gikuha Niya ang imong papa. Gikuha pud Niya ang imong igsoon. Gikuha silang duha, ug namatay pa gyud sila diha mismo sa imong mga bukton. Namatay siya dinha. Namatay pud ang imong asawa, samtang nagahawid sa imong mga kamot. Ug ngani niadtong namatay ang imong bata, ginatawag mo Siya para tabangan ka. Pero gitalikdan ka Niya. Unsa na ma'y hunahuna mo mahitungod Kaniya?"

141 Ingon ko, "Gihigugma ko Siya uban sa tanan-tanan nga anaa kanako. Kung ihatud man ko Niya sa impiyerno, higugmaon ko gihapon Siya." Matarung gayud Siya. Dili ko kini ingon nga ginasulti-sulti lang; napamatud-an ko na kini sulod sa bayntesais ka tuig. Tinuod kana.

142 Kung gihigugma n'yo Siya! Dili kini ingon nga usa ka katungdanan, nga, "Dili ko mahimo *kini*, ug dili ko mahimo *kana*." Gihigugma n'yo gayud Siya nga gusto n'yo gayud nga buhaton kana, tungod kay gipili man Niya kamo. Dili kamo ang nagpili Kaniya, kondili Siya ang nagpili kaninyo.

143 Moingon mo, "Gipangita ko man ang Ginoo, ug ginapangita ko gihapon ang Ginoo."

Walay tawo nga nagapangita sa Dios. Ang Dios hinoon, ang nagapangita sa tawo. Tingali'g ang pabor Niya ang ginapangita n'yo, pero gikinahanglang usabon úsa sa Dios ang inyong kinaiyahan sa dili pa ninyo Siya pangitaon, tungod kay, makasasala man kamo, baboy pa kamo. Husto kana.

144 Ug ang uban kaninyo nga mga nagasimba ug nagakinabuhi tungod lang sa inyong pagkamiyembro, mogawas mo dinhi ug buhaton ang kung unsang butang diha sa kalibutan, ug pagkahuman mobalik mo ug moingon, "Oo, miyembro man ko sa iglesia." Bueno, halayo ra kaayo kana sa pagkahimong iya sa Dios. Mao gayud. Dili ko. . . Pero makita man ninyo ang mga tawo nga nagabuhat niana, masulti n'yo mismo. Oh, sila'y mga maayo man nga miyembro sa iglesia. Tinuod kana. Puede man gud nga miyembro gihapon kamo sa iglesia ug ginabuhat sa gihapon ang ingon-anang mga butang, pero dili gyud kamo mamahimong Cristohanon ug ginabuhat sa gihapon ang mga ingon niana.

145 Sama sa gikaingon ko, kaganinang buntag, "Ang tigulang nga uwak, kung aduna ma'y usa ka tigpakaaron-ingnon, ang uwak na kana." Husto. Ngani siya ug ang salampati atua man

niadto sulod sa mao ra nga arka, nagatugdon sa usa ra ka tugdonganan. Ug nalipay gyud ang maong uwak sa dihang gibuhian siya, ug migawas siya niadtong Iglesia, aron nga makagawas siya ug makatugdon didto sa usa ka dugay nang patay nga lawas ug mi “caw, caw,” ug mikaon gikan *niadto*, mikaon sa kabayo, ug mikaon sa baka, ug kung unsa pa man, nalipay gyud siya. Apan sa dihang gibuhian na ni Noe ang salampati, wala gyud siya’y nakita nga kapahulayan para katugdonan sa lapa-lapa sa iyang mga tiil. Aduna man pud unta siya’y katungod nga motugdon sa usa ka patay nga hayop sama sa gibuhat sa uwak, pero duha man gud kadto ka managlahi nga kinaiyahan. Ang usa sa ilaha, usa man gud siya ka salampati, sa sugod pa lang. Ang usa sàb usa na ka uwak, sa sugod pa lang.

¹⁴⁶ Apan, kung matikdan ninyo, makatugdon ang uwak dinha usa usa ka patay nga lawas ug mokaon niini, tunga sa adlaw. Samtang ang salampati atua kini sa tamnanan og trigo ug mokaon niini, tunga sa adlaw. Ug mahimo man sa uwak nga molupad didto ug mokaon sa pagkaon nga iya sa salampati, kutob sa gusto niya. Mahimo ra niyang mokaon og ingon ka daghang trigo sama sa uwak, o, sama sa salampati diay. Apan siya, ang uwak, mahimo niyang mokaon sa pagkaon nga iya sa salampati, pero dili gyud mahimo sa salampati nga mokaon sa pagkaon nga iya sa uwak. Tinuod.

¹⁴⁷ Busa, mahimo sa dugay na nga tigpakaaron-ingnon nga motambong sa simbahan, ug magsadya ug mosinggit ug magdayeg sa Ginoo, ug magpadayon nga ingon niana, ug sa paggawas niya magakalipay na usab sa mga butang nga iya sa kalibutan. Pero dili gyud kana mahimo sa usa ka natawo na pag-usab nga Cristohanon, tungod kay ang gugma man sa Dios ang nagatukmod kaniya ngadto sa usa ka punto nga dili niya mahimong buhaton kana.

¹⁴⁸ Busa kung usa kamo ka Cristohanon tungod lang kay nagpamiyembro kamo sa iglesia, ug giundangan n’yo na ang *ingon-ani* ug *ingon-ana*, pero anaa gihapon kaninyo ang mao rang tinguha, nan gikinahanglan ninyong maituslob pag-usab. Eksakto gayud.

¹⁴⁹ Ug kamong mga kababayen-an nga nagasul-ob nianang mugbo nga purol ug maglakaw-lakaw dinha sa dalan, ug unya tawgon n’yo ang inyong kaugalingon nga usa ka “magtotoo.” Magtotoo lagi kamo, pero usa kamo ka dili-maayo nga ehemplo, mao gyud. Kay kung anaa gayud si Cristo sulod sa inyong kasingkasing, dili na man ninyo hunahunaon ang ingon nianang mga butang. Dili ko igsapayan kung unsa ma’y ginabuhat sa tanang uban pa nga mga kababayen-an, ug ginabuhat sa uban pang mga batan-ong babaye, lahi gyud kamo, tungod kay gihigugma n’yo gayud si Cristo.

150 Naistorya ko ang usa ka babaye niadtong miaging adlaw, sa balay niya, ug gipataas niya ang iyang mga kamot nga nakaingon *niini*, og miingon, “Rev. Branham, halos hubo ra gyud ko, pag-ania ko sa akong balay. Nga nagalakaw-lakaw.”

151 Sa hunahuna ko, “Makauulaw ka.” Bisan sa inyo mismong balay, dili ko igsapayan kon asa man kamo. Husto. Magbisti kamo ug manggawi ingon nga usa ka babaye, ingon nga usa ka maligdong nga babaye. Makauulaw kamo. Pero padayon gihapon mong. . . Oo, ang ingon sa Biblia, “Kung nahigugma kamo sa ingon anang mga butang, sa mga butang nga iya sa kalibutan, ang gugma ni Cristo wala man lang diha kaninyo.” Ug kung gihigugma n’yo gayud ang Ginoo, sa tibuok n’yong kasingkasing, sa tibuok n’yong kalag, sa tibuok n’yong hunahuna, nan ipahilayo n’yo gayud sa inyo ang mga mugbong mahugaw, mahilas nga mga bisti. Husto kana.

152 Ug kamong mga diyakono, ug kamong uban pa dinhi, pagnagalakaw mo dinha sa dalan, mang-unat mismo ang inyong liog sa pagtutok ngadto nianang mga babaye. Makauulaw kamo; ug nagapatawag pa sa inyong kaugalingon nga “mga anak sa Dios.” Kabalo ko nga makapaso kana, pero mas maayo pa nga mapaso kamo kaysa masunog didto hangtud sa kahangturan. Mao nga kung ginabuhat n’yo ang ingon-anang mga butang. . . Bueno, dili man ninyo mapugngan kung may babaye nga molakaw sa dalan, nga halos hubo na. Mao nga kamo, kung motan-aw kamo, nan makita gyud ninyo siya, pero mahimo man ninyong ilingiw ang inyong ulo. Ang ingon sa Biblia, “Ang si kinsa man nga nagatan-aw sa usa ka babaye nga may pagkaibog kaniya, nakapanapaw na uban kaniya sa imong kasingkasing.”

153 Sultihan ko kamo og usa ka butang, minahal nga igsoong babaye, manubag gyud kamo niana. Dili ko igsapayan, mahimong ingon ikaw ka putli sama sa usa ka lirio. Tingali’g wala ka pa gayud aktuwal nga nakabuhat og ingon-ana nga matang sa sala, imoral nga sala, sa tibuok mong kinabuhi. Pero kung mangbisti ka nga ingon niana, nan manubag gyud ka sa Paghukom tungod sa pagpanapaw uban ang matag lalaki nga mitan-aw sa imoha. Gisulti kana sa Biblia. Ug kon manglakaw kamo dinha sa dalan nga ingon-ana ang pagpamisti, kinsa man ang sad-an, ang lalaki ba? Dili, sir. Kamo mismo. Tungod nga gipasundayag n’yo man ang inyong kaugalingon nga ingon niana.

154 Hinoon aduna ma’y halangdon nga puwesto ang babaye. Sagrado kini, matahum, og maanindot nga puwesto. Pero kinahanglan niyang ipapabilin ang iyang kaugalingon nga ingon niana, sa pagtuman sa iyang katungdanan nga angay kaniya, ingon nga usa ka inahan, ingon nga usa ka babaye ug iyang pagkababaye mismo. Pag balion na niya ang iyang pagkababaye, nan mabali usàb ang dugokan sa bisan unsa nga nasud. Ug mao kana’y hinungdan, nga sa karong panahon, nadaut ang atong

nasud, tungod kana sa pagka-imoral na sa atong kababayan-an. Eksakto gyud kana. Oo. Tungod sa kadautan nga anaa sa atong taliwala, mao'y hinungdan sa pagkadaut niini.

¹⁵⁵ Ang gikinahanglan ninyo mao ang matagbo kining si Melquisedec usa ka higayon. Amen. Tugotan Siya—tugotan Siya nga panalanginan kamo ug ipaambit kaninyo ang bino, ang tinapay, ang Kinabuhing Walay Katapusan. Dayon mamahimong lahi na ang inyong panglantaw sa mga butang. Dayon inyong . . . Malahi na gayud. Dili n'yo na gusto nga ang mga lalaki mohimo og . . . managhoy sa inyo nga mora'g ihalas nga iro, managhoy nga mora'g lobo, o kung unsa man ang tawag n'yo niana. Dili na gayud. Tungod nalahi na man kamo.

¹⁵⁶ Ug buut n'yo bang isulti kanako nga nagabisti kamo nga ingon niana, ug mogawas dinha, tungod sa unsa pa man nga hinungdan? Moingon mo, "Aba, mas bugnaw man gud." Estorya mo lang kana. Dili intawon mas bugnaw. Nagpamatuod man ang siyensiya nga dili kana mas bugnaw. Kana'y . . . Pagpangibog kana nga nagaabot sa inyo, igsoong babaye. Wala lang mo nahibalo niana. Dili ko tuyo nga pasakitan kamo, kondili ginapaninguhaan ko lang nga pasidan-an kamo. Daghang matarung nga babaye, nga ingon gayud ka limpyo, buutan nga babaye, ang nagalakaw-lakaw nga nakasul-ob og ingon-anang mga bisti, diha sa dalan, nga wala man lang nahibalo sa iyang ginabuhat, tungod nga may usa ka nag-backslide nga magwawali ang nahadlok nga basin dili na magbayad sa simbahan og ikapulo ang bana sa maong babaye. Pero kung nahinagbo lang unta sa maong magwawali si Melquisedec, nan dili niya hunahunaon ang mga ingon-anang butang. Iwali gyud niya ang Ebanghelyo. Bisan pa'g mapaso ang panit sa ilang likod, iwali niya Kini, sa gihapon. Eksakto gayud.

¹⁵⁷ Ginabuhat n'yo kana, ug ginabuhat n'yo kana tungod sa espiritu sa pangibog. Ug kamong mga kalalaken-an nga ginatugotan ra ang inyong mga asawa nga buhaton ang ingon-anang mga butang, gamay ra gyud ang pagsalig ko nga tinuod kamo nga lalaki. Husto kana. Husto kana. Bueno, walay pagdayeg niana, tungod, o, walay pasaylo-pasaylo nga nasulti ko kana, tungod kay, tinuod man kana. Ang si kinsa mang lalaki nga tugotan ra ang iyang asawa nga mogawas diha sa dalan ug manglihok nga ingon-ana, igsoon, angay siguro nga ikaw ang magsul-ob sa *iyang* mga bisti. Husto. Ikaw, mismo, my!

¹⁵⁸ Wala ako nagaingon nga dili kana buhahon sa akong asawa. Pero mausab sa siguro ko ug matuis, gikan sa kung unsa ako karon, kung magapuyo man ko uban kaniya samtang ginabuhat niya ang ingon-ana. Ug eksakto gayud kana.

Ang akong mga anak nga babaye, tingali'g buhaton man nila kana pag madalaga na sila. Wala ako nagaingon nga dili nila kana buhaton. Wala ko mahibalo. Anaa ra kana sa kalooy sa

Dios. Pero nagalaum ko nga dili gyud unta nila buhaton. Kung buhaton man nila, nan pagayatakan nila ang mga pag-ampo sa usa ka matarung nga amahan. Pagayatakan nila ang kinabuhi sa usa ka tawong naningkamot nga magkinabuhi nga matarung, kung ugaling buhaton nila kana. Tinuod. Pero ginatinguha ko gayud nga magkinabuhi nga matarung, magtudlo sa husto, mamahimong husto, ug matudloan sila sa husto. Kung buhaton man nila kana, nan panglimbasogan nila ang ilang pagpaingon sa impiyerno, ibabaw sa akong mga pagwali, ug ibabaw sa akong Cristo, ug ibabaw sa akong mga pagpasidaan, husto kana, kung ugaling buhaton nila kana. Mao gayud. Husto kana.

¹⁵⁹ Makauulaw kamo. Pero kung mahinagbo ninyo si Cristo, sa nawong og nawong, ug panalanginan Niya kamo, ug ipahimutang diha sa inyong kasingkasing ang halok sa pagpanghimatuod, ang tanan nga yawa sa impiyerno dili gyud makapasul-ob kanimo og ingon niana pag-usab. Husto kana. Nausab ka na gikan sa kamatayon ngadto sa Kinabuhi, ug ang imong mga paghigugma napahimutang na ngadto sa mga butang nga iya sa itaas ug dili na sa mga butang nga iya sa yuta. Amen. Mas maayo kung biyaan ko na kana nga hilisgotanan. Malisud man gud. Sige. Apan mao kana ang Kamatuoran.

¹⁶⁰ Sige, sa pagpadayon pa nato og dugang karon, dayon tapuson na nato.

. . . kadtong sa mga anak ni Levi, . . . nga nanagdawat og ikapulo sa katugdanan sa pagkasacerdote, ug may sugo sa pagkuha sa ikapulo gikan sa mga tawo sumala sa kasugoan, nga, gikan sa ilang mga igsoon, bisan naggikan kini sila sa mga hawak ni Abraham:

Apan siya kang kinsang kagikanan wala isipa gikan kanila nga nagdawat sa mga ikapulo gikan kang Abraham, ug nga nagapanalangin kaniya nga nagbaton sa saad.

Apan sa walay bisan unsa nga mga paglalis ang labing ubos gipanalanginan sa labing labaw.

Ug dinhi ang mga tawo nga mamatay nagadawat sa mga ikapulo; apan dinhi ginadawat kini, niadtong usa nga gipanghimatud-an nga siya buhi. Ug ako . . .

Ug ikaingon man . . . gani nga, bisan si Levi, . . . nagadawat sa ikapulo, nagadawat sa ikapulo, mihatag sa ikapulo pinaagi kang Abraham.

Kay didto pa siya sa mga hawak sa iyang amahan, sa gisugat siya ni Melquisedec.

¹⁶¹ Ang inyong—ang inyong pagtagad kang Cristo aduna gayu’y dakung epekto sa kung unsa ang mamahimo ninyong mga anak. Ang kinabuhi nga inyong ginakinabuhi sa atubangan sa inyong pamilya aduna usab og epekto sa kung unsa ang mamahimo

ninyong mga anak. Tungod kay, miingon man ang Biblia, nga, “Pagaduawon Niya ang mga anak tungod sa pagkadautan sa mga ginikanan hangtud sa ikatulo ug ikaupat nga kaliwatan.”

¹⁶² Karon, kadiyut na lang, sa dili pa tà magtapos.

Ug kung *diha pa’y pagkahingpit* (gihisgotan na usab ang pagkahingpit) *pinaagi sa pagkasacerdote ni Levi, (kay sa ilalum niini midawat ang mga tawo sa kasugoan,) unsa pa ma’y pagkinahanglan nga may moabot. . . laing sacerdote nga patindogon sumala sa laray ni Melquisedec, ug dili pagaisipon sama sa laray ni Aaron?*

¹⁶³ Ang kasugoan, ang pagka-legalista, kita n’yo, “Oh, kinahanglan mong buhaton *kini*. Kung dili mo buhaton *kini*, nan dili ka Cristohanon. Kung dili mo saulogon ang sabbath! Kung dili mo. . . Kung mokaon ka og karne! Kung buhaton mo ang mga *ingon-aning* butang!” Kining tanan mga ideya sa pagka-legalista. “Ug kinahanglan nimong mosimba. Kung dili, nan magbayad ka og multa tungod niana. Kinahanglan nimong mag-nobena.” Binuang ra kana nga mga butang. Naluwas kamo pinaagi sa grasya sa Dios, pinaagi sa pagkahibalo-nang-daan sa Dios, pinaagi sa Iyang pagpili-nang-daan. Gitawag sa Dios si Abraham pinaagi sa pagpili-nang-daan, pinaagi sa pagkahibalo-nang-daan. Siya ang nagtawag. Gidumtan Niya si Esau, ug gihigugma si Jacob, sa wala pa man matawo bisan ang usa kanila. Husto kana. Ang—ang pagkahibalo-nang-daan sa Dios ang nasayod niining mga butanga.

¹⁶⁴ Dayon moingon mo, “Unsa ma’y kapuslanan nga iwali pa ang Ebanghelyo?”

¹⁶⁵ Karon isulti ko kaninyo, *kini*. Gitubag kana ni Pablo, o ni Jesus, diay. Ania si Jesus. Ang ingon Niya, “Ang Gingharian sa Dios sama ra sa usa ka tawo nga miadto didto, sa usa—usa ka lim-aw o usa ka lanaw, ug gitambog niya ang pukot. Pagbira na niya. Gikan didto, duna siya’y napukot nga mga bao. Duna siya’y napukot nga mga gagmay’ng bao. Duna siya’y napukot nga mga bitin. Duna siya’y napukot nga mga taluto. Duna siya’y napukot nga mga baki. Duna siya’y napukot nga mga damang. Duna siya’y napukot nga mga nagakaon og hugaw. Duna—duna sàb siya’y napukot nga mga isda.” Bueno, igo lang namukot ang maong tawo.

¹⁶⁶ Ingon niana ang Ebanghelyo. Ania, ginawali ko ang Ebanghelyo. Ginatambog ko lang ang pukot. Sa pagbira nako niana, moingon ko, “Ang tanan nga may tinguha, bisan kinsa man, paduola siya.” Adunay pipila nga mangduol, sa altar. Mag-alirong silang tanan diha sa altar. Mag-ampo sila. Manghilak sila. Pero wala ko masayod sa matag usa. Wala na ko’y labot niana. Wala man ko gipadala para maghukom.

167 Apan, adunay pipila dinha nga mga baki. Adunay pipila nga mga taluto. Adunay pipila nga mga bitin. Adunay, pipila, nga mga bao. Ug aduna gyu'y pipila nga mga isda. Pero dili ko na katungdanan ang maghukom. Moingon ra ko, "Amahan, ania na ang akong mga napukot."

168 Pero, ang baki usa na gyud ka baki, sa sugod pa lang.

169 Ang damang, molingkod dinha ang tigulang nga damang ug magtan-aw-tan-aw ra sa palibot, sa hamubong panahon, iliraw-liraw ra ang dagku niyang mga mata, motan-aw sa palibot, og moingon, "Kabalo ba ka kung unsa? Igo na gayud og dili na ako makapabilin pa Niini." Plop, plop, plop, plop, og mogawas na.

170 Ang babayeng bitin sàb iyahat niya ang iyang ulo, ug moingon, "Bueno, kabalo ba ka kung unsa? Kung magwali sila og ingon niana, nga batok sa pagsul-ob og mga purol ug mga ingon-anang butang, dili na ko motambong dinha. Busa biyaan ko na kanang pundok sa mga holy-roller. Ingon-ana man gud sila." Bitin man gud ka sa sugod pa lang. Eksakto gayud. Oo.

171 Ug ania pud ang lalaking baki, nga may dakung sigarilyo diha sa iyang baba, nga mora'g toro nga Texas nga gitangtangan og sungay, motindog dinha ug motan-aw sa palibot, moingon, "Bueno, wala ra man ko nakabati og pagkondena bahin sa akong pagpanigarilyo. Mogawas na lang ko dinhi, karon dayon." Bueno, tigulang baki, ingon-ana ka na man gud, sa sugod pa lang. Eksakto gayud. Eksakto gayud.

172 Ang inyong kinaiyahan nagapamatuod gyud kung unsa kamo. Ginapakita, ginareplektar sa inyong kinabuhi kung unsa gyud kamo, sa sinugdan pa lang. Dili lisud para nako nga makita kana. Dili lisud para ninyo nga makita kana.

173 Kung moadto ako kang Roy Slaughter nga mag-uuma nga ania karon nagalingkod, ug makakita ko og mga baboy nga nagalunang sa nagkatipun-og nga hugaw, nagakaon og hugaw, dili ako maghunahuna og dili maayo bahin niana. Tungod baboy man kana. Pero kung makakita ako og usa ka karnero nga maanaa dinha sa nagkatipun-og nga hugaw, nan mahibulong gyud ko. Uh-huh. Kita n'yo? Pero ayaw mo'g kabalaka, dili man ninyo siya makita dinha. Dili man niya maagwanta kana. Husto kana.

174 Ug ang usa ka tawo nga natawo na sa Espiritu sa Dios dili gyud niya gusto ang mga butang nga iya sa kalibutan. Husto kana, "Kay kung nahigugma kamo sa kalibutan o sa mga butang nga iya sa kalibutan, ang gugma sa Dios wala man lang diha kaninyo."

175 Kung makigkuyog-kuyog ako sa nagkadaiyang mga babaye matag adlaw, ug pag-uli ko, sultihan ko ang akong asawa nga gihigugma ko siya, nan kabalo gyud siya nga bakakon ako. Mas lanog man nga nagasulti ang akong mga lihoc kaysa akong mga pulong. Mao gayud. Ginapamatud-an ko lang sa iyaha nga

wala ko siya gihigugma, tungod kay dili man ako matinud-anon sa iyaha.

¹⁷⁶ Kon sultihan pud ko niya nga gihigugma niya ako, ug sa matag higayon nga wala ako, mogawas diay siya kauban ang ubang lalaki, nagapamatuod ra kana nga wala gyud siya nahigugma kanako. Oo. Ang iyong mga lihok ang nagapamatuod niana. Dili ko igsapayan kon sultihan man niya ako sa makadaghan, “Bill, gihigugma ko ikaw, ug wala na gyu’y lain pa sa kalibutan kondili ikaw lang,” kabalo ko nga bakakon siya.

¹⁷⁷ Ug kon moingon ka, “Ginoo, gihigugma ko Ikaw,” pero ginabuhat mo ang mga butang nga iya sa kalibutan, nasayod ang Dios nga bakakon ka, sa sugod pa lang. Tungod ngano man? Unsa ma’y kapuslanan sa pagdawat og usa ka alang-alang nga kasinatian, ug butang nga ingon niana, sa dihang ang halapad nga kawanangan sa Langit napuno man sa butang nga tinuod? Nganong tinguhaon man ninyo nga mamahimong miserabli, hangtud pamahayag ra, dili bug-os, hilaw, nga Cristohanon? Sa dihang, puede man kamong mamahimong usa ka matuod nga natawo na pag-usab nga anak sa Dios, nga ang mga kampanya sa kalipay sa Langit nagabagting sulod sa inyong kasingkasing, nagakalipay, ug nagadayeg sa Dios, ug nagakinabuhi og usa ka kinabuhi nga madaugon pinaagi ni Jesus Cristo.

¹⁷⁸ Dili nga ginapugos n’yo ang inyong kaugalingon sa pagbuhat niana, tungod kay mapakyas ra kamo, sa sugod pa lang. Kondili dawata Siya, Pulong Niya Kini, ug sumalig kamo sa Iyang gisulti nga mao ang Kamatuoran. Ug toohi n’yo Siya, ug higugmaa n’yo Siya, ug himoon Niya ang tanan nga magapamuhat nga husto para kaninyo. Mao gayud. Ingon niana ang ideya.

¹⁷⁹ Panalanginan kamo sa Ginoo. Dili ko unta gusto nga mangasaba sa inyo, pero, igsoon, maayo man gud kung makasaban kamo og diyutay. Mga gagmay’ng bata ko kamo. Kita n’yo? Ug ang si kinsa man nga papa nga nahigugma sa iyang mga anak sigurado gayud nga tul-iron niya sila, kay kon dili nan dili siya husto nga klase sa papa. Husto ba kana? Husto kana. Ug usa lang ang balaod niini nga papa, ug mao kana ang balaod sa panimalay. Ug ang Dios usab adunay usa lang ka balaod, ug kana mao ang Iyang Pulong.

¹⁸⁰ Kung nagatoo kita sa Iyang Pulong, nan magkinabuhi kita sumala sa Iyang Pulong. Katungdanan nato kini, kung nahinagbo na gyud nato ang Dios. Dili tungod kay nagaingon kamo, “Bueno, nagasimba man ko, ug kinahanglan kong buhaton *kini*.” Miserabli ka lang. Ayaw buhata kana. Nganong tinguhaon man nimo nga mamahimong miserabli, mahuyang, dautan nga uwak, sa dihang puede ka man mamahimong usa ka salampati? Mao gayud. Gikinahanglan lang nga mabag-o ang imong kinaiyahan. Ug kon nabag-o na ang imong kinaiyahan,

mamahimo ka nang anak nga lalaki ug anak nga babaye sa Dios, nga may pakigdait sa Dios.

¹⁸¹ Si Jesus! “Tungod niana si Jesus usab, aron Iyang mabalaan ang mga tawo pinaagi sa Iyang Kaugalingong Dugo, nag-antus sa gawas sa mga ganghaan,” Mga Hebreohanon 13:12 ug 13. Mga Taga-Roma 5:1, “Busa sa ginapakamatarung kita tungod sa pagtoo,” dili pinaagi sa pagpakiglamano, dili pinaagi sa bautismo sa tubig, dili pinaagi sa pagpandong og mga kamot, dili pinaagi sa pagsinggit, dili pinaagi sa pagsulti og laing mga pinulongan, dili pinaagi sa unsa mang sensasyon. “Kondili gipakamatarung na tungod sa pagtoo, kita may pakigdait na sa Dios pinaagi sa atong Ginoong Jesus Cristo.” Miagi na kita gikan sa kamatayon ngadto sa Kinabuhi, ug nahimong mga bag-ong binuhat, tungod kay mitoo kita sa bugtong Anak sa Dios, ug gidawat Siya ingon nga atong personal nga Manluluwas. Ug nagapamuhat ang Iyang Dugo, karong gabhiona, ingon nga halad-pasig-uli para sa atong sala, aron mopuli kanato.

¹⁸² Sa Daang Tugon, adunay usa lamang ka dapit sa pagpakig-fellowship, kana’y ilalum sa Dugo. Ang matag magtotoo kinahanglang magpailalum sa dugo. Pag gipatay na ang pula nga dumalagang baka, himoon siya nga halad tungod sa sala. Kinahanglan nga pula kini. Ug sa ika-19 nga kapitulo sa Exodo, kung aduna man sa inyo ang gustong mobasa niana. Ug ginakuha siya, apil ang mga kuko, tanan-tanan, og dungan nga ginasunog. Ug pagkahuman kadto mao ang himoong tubig sa pagkabinulag. Ipahimutang kadto sa gawas sa mga ganghaan. Kinahanglan hinlo nga kamot ang maghawid niadto. Ang dugo niadtong dumalagang baka ipahimutang sa atubangan...sa kongregasyon, ug ipahid sa makapito ka higayon sa ibabaw sa pultahan. Ug dayon, ang matag mahugaw nga tawo nga moduol didto, kinahanglan niya unang ilhon ug tan-awon kadtong dugo, ug maamgo nga aduna lamang og pagpakig-fellowship ilalum nianang dugo. Mao lang kadto ang dapit kon diin ang magsisimba tinuod gayud nga makasimba, sa ilalum sa dugo.

¹⁸³ Dayon, ang unang butang nga kinahanglan niyang buhaton, adisir siya makaduol ilalum sa dugo, kinahanglan úna nga isablig sa iyaha ang tubig sa pagkabinulag, ug aron ang mahugaw mamahimong hinlo.

¹⁸⁴ Ug kuhaon nila ang tubig sa pagkabinulag ug isablig kadto sa lumalangyaw, ug mahimulag siya sa iyang mga sala. Ug pagkahuman moduol siya sa ilalum niadtong pito ka raya sa dugo, ug magpakig-fellowship sa tanang uban pa nga mga magtotoo diha sa Presensiya sa Dios.

¹⁸⁵ Adunay usa lamang ka paagi sa pagbuhat niana. Dili ang pagpakiglamano, dili ang pagpamiyembro sa iglesia, dili pinaagi sa mga bautismo, dili pinaagi sa mga emosyon; kondili sa paglakaw ngadto sa mga tubig sa pagkabinulag, pagpandong

sa inyong mga kamot, nga may pagtoo, diha sa ulo ni Jesus, ug moingon, “Usa ako ka makasasala, ug namatay Ka puli kanako. Ug may sa kung unsang Butang sa kinasuloran ko ang nagasulti kanako nga pasayloon Mo ako sa akong mga sala, ug ginadawat ko Ikaw ingon nga akong personal nga Manluluwas karon.” Moduol sa ilalum sa Dugo, didto, og magpakig-fellowship uban sa mga anak sa Dios. Ingon niana. Mokaon og tinapay, moinom og bino, ug magpakig-fellowship sa iglesia.

¹⁸⁶ Oh, dili ba Siya kahibulongan? Dili ba Siya maayo? Karon, tingali’g daw sa talagsaon kini para kanimo, higala. Apan para sa asa—asa ba nga nagatindog ako dinhi ug nagasulti niining mga butanga? Ginasulti ko ba kini para mahimong lahi ako sa ubang tawo? Kung ingon-ana man, nan gikinahanglan kong maghinulsol. Ginasulti ko Kini tungod kay gisulti Kini sa Dios, tungod kay Pulong Kini sa Dios. Ug paminaw mo. Moabot ang panahon, ug karon mao na, nga ang mga tawo magsingabot gikan sa sidlakan paingon sa kasadpan, sa pagpaningkamot nga pangitaon ang Pulong sa Dios, ug dili na makakaplag Niini.

¹⁸⁷ Pag nagatambong kamo sa usa ka panagtigum, ang unang butang nga ginabuhat n’yo, mosulod kamo dinha ug nagasulti sila og laing mga pinulongan ug nagahatag og mga hubad, ug adunay motindog ug padayon nga magasulti og Kasulatan; ug karnal kana. Walay pagduhaduha. Miingon kanato ang Dios nga “dili kamo magagamit sa pagsumaysamay nga walay kapuslanan,” dili ba miingon Siya? Kung gisulat Niya Kini sa makausa, tohi ninyo Kini. Dili na Niya kinahanglan pang isulti Kini pag-usab. Okey man ang pagsulti og laing mga pinulongan ug ang paghatag og hubad, pero kinahanglan nga usa kini ka mensahe nga direkta mismo ngadto sa iglesia ug ngadto sa usa ka tawo, dili ingon nga karnal lang ug mga ingon-anang butang. Ug ngani aduna na dayon kamo’y ginahimo sa tanan na niining uban pang mga butang.

¹⁸⁸ Niadtong miaging adlaw, may duha ka lalaki ang miadto sa . . . ug usa ka lalaki ug iyang asawa, ug usa pa ka lalaki ug iyang asawa sàb, mga batan-on pa nga nagminyo, miadto sila sa usa ka lugar, aron moadto sa Africa ingon nga misyonaryo. Adunay mitindog ug naghatag og propesiya, ug nagsulti og laing mga pinulongan ug naghatag og hubad, nga, “Ilang giminyoan ang asawa sa usa’g usa.” Nga kono, “Dili dapat ingon niana. Nasayup sila og giminyoan.” Ug mao nga nagbulag kadtong duha ug nagminyo, pag-usab. Giminyoan niadtong usa ka lalaki ang asawa niadtong usa ka lalaki, niadtong usa pa ka lalaki, didto kini sa usa ka iladong Pentecostal nga denominasyon, ug nangadto sila sa Africa ingon nga mga misyonaryo.

¹⁸⁹ Igsoon, pag nanumpa na kamo, obligado na kamo niana nga pagpanumpa ingon nga kamatayon lang ang makapalingkawas kaninyo niana. Eksakto. Mao gayud. Pag nanumpa kamo, nabugkos na kamo niana.

¹⁹⁰ Ang tanan niana nga, mga kabuangan! Ug ngani miabot na kini sa punto nga pag motambong ka sa mga panimbahon, ingon na ka bugnaw ug pormal ug uga na, hangtud nga ang espirituwal nga termometro nahimo nang singkwenta nga mas ubos sa siro. Mangligkod lang dinha ang mga tawo nga mora og mga hubag sa pepino, nga ingon na ka aslom ug walay-pagpakabana ug nagamugtok ra. Ug kung aduna ka’y madungog, dapit sa luyo sa may suok, nga medyo mosulti lang og hinay nga “amen,” usahay, mora ba og nasamokan na sila, silang tanan mang-unat sa ilang liog nga mora’g gansa, molingi sa palibot, aron tan-awon kung unsa kaha’y nahitabo. Kabalo mo nga tinuod kana. Dili ko ginasulti kana para magpakatawa. Dili man kini lugar para sa pagpakatawa. Tinuod kana. Oo. Ginasulti ko kini tungod kay kini mao ang Ebanghelyong Kamatuoran.

¹⁹¹ Ug sa pikas bahin, aduna ka na sab og pundok sa mga kabuangan nga mga karnal nga emosyon, ug hangtud miabot na sa punto nga ang matuod nga Pulong sa Dios panagsa mo na lang Kining madungog: ang karaang tunga-sa-dalan, ang Ebanghelyo, ang Kahayag sa akong dalan, alleluyah, ang Dugo sa Cordero, ang gugma sa Dios nga nagapahimulag kanato gikan sa mga butang nga iya sa kalibutan.

¹⁹² “Nakasulti ka na ba og laing mga pinulongan, igsoon? Wala pa diay nimo naangkon Kini. Nakasinggit ka na ba hangtud nga mabati mo nga namugnaw ang imong likod? Nakakita ka na ba og mga bola nga kalayo?” Oh, binuang! Wala gyu’y ingon niana.

¹⁹³ Mitoo ka na ba kay Ginoong Jesus Cristo ug gidawat Siya ingon nga imong personal nga Manluluwas? Ug ang Espiritu sa Dios nagapamatuod sa inyong espiritu, nga kamo’y mga anak nga lalaki ug mga anak nga babaye sa Dios. Ug ang inyong kinabuhi nagapamunga og bunga nga gugma, kalipay, pakigdait, pagkamapuanguron, pagkamaayo, kaaghop, kalulot. Kung ingon-niana kamo’y Cristohanon na. Kung dili man, nan dili ko igsapayan kung unsa ma’y ginabuhath ninyo.

Miingon si Pablo, “Itahan ko man ang akong lawas aron pagasunogon ingon nga usa ka halad. Masayran ko man ang tanang mga tinago sa Dios. Makapabalhin man ako og mga bukid pinaagi sa akong pagtoo. Makasulti man ako og mga pinulongan nga iya sa mga tawo ug sa mga Manulonda. Wala gihapon ko’y kapuslanan.” Husto ba kana? Unang Mga Taga-Corinto 13; tan-awa n’yo kung husto ba Kana o dili.

¹⁹⁴ Karon tan-awa n’yo kung—kung sa Mga Taga-Corinto ba, Ikaduhang Mga Taga-Corinto 13, nagatoo ko nga dinha kana. O, bueno, sa Una o Ikaduhang Mga Taga-Corinto. Sa Unang Mga Taga-Corinto, Unang Mga Taga-Corinto 13, ang husto. “Bisan kung ako magasulti og mga pinulongan nga iya sa mga tawo ug sa mga Manulonda,” sa duha ka matang nga mahimong hubaron

ug kanang, dili mahubad, “Wala ako’y kapuslanan.” Busa unsa ma’y pulos kon magbinuang tà niini, dinhi?

¹⁹⁵ “Bisan masabtan ko pa ang tanang mga tinago sa Dios.” Nan nganong moadto pa man mo sa mga seminaryo ug maningkamot nga magtuon og ayo? Mas siguradohon mong matarung ka sa Dios, una. Mao gayud. “Bisan kung ako, ‘Oh, mapanalanginong alleluyah!’”

¹⁹⁶ Miabot sa punto nga dili ka na kono puedeng magkaaduna og usa ka kongregasyon gawas kon aduna ka’y dakung buluhaton sa pagpang-ayo o kung unsa nga matang sa mga milagro nga ginapamuhat. “Usa ka mahuyang ug mananapaw nga kaliwatan magapangita og ingon niana.” Unsa ma’y gikinahanglan n’yo niana?

¹⁹⁷ Miingon si Pablo nga mabuhat man niya ang tanang matang sa mga butang, bisan ang magpabalhin og mga bukid, pero wala gihapon siya’y kapuslanan. “Bisan ang mga sinultihan, kini mangahunong. Kon kini ma’y kaalam, kini mahanaw. Bisan pa’g propesiya, kini mapakyas. Apan kon ang hingpit moabot na, kini magapabilin hangtud sa kahangturan,” ug ang gugma maoy kahingpitan. “Gihigugma sa Dios ang kalibutan, mao nga gihatag Niya ang Iyang bugtong Anak, nga,” ang si kinsa mang mamugnaw, ang si kinsa mang mangurog, ang si kinsa mang magsulti, kinsa-...? “ang si kinsa man nga motoo Kaniya dili malaglag, kondili may Kinabuhi nga Walay Katapusan.” Toohi n’yo kini, mga anak.

¹⁹⁸ Ginahimo nila kining ingon ka komplikado, ang *ingon-aning* mga butang ug *ingon-anang* mga butang. Nga, sa laktud nga pagkasulti usa ra man kana ka butang: ang inyong personal nga pagtoo sa Dios. Mao gayud. Mao kana ang nagapamatuod. “Kay pinaagi sa pagtoo,” dili pinaagi sa pagbati. “Pinaagi sa pagtoo,” dili pinaagi sa emosyon. “Pinaagi sa pagtoo,” dili pinaagi sa sensasyon. “Kondili pinaagi sa pagtoo kamo naluwas; ug pinaagi sa...” Tungod ba sa pagpangita ninyo sa Ginoo? Tungod ba kay maayo kamo nga tawo? Tungod kay, “Ang Dios, pinaagi sa grasya, giila na kamong daan ug gitagana na kamong daan sa Kinabuhing Walay Katapusan.”

¹⁹⁹ Miingon si Jesus, “Walay tawong makahimo sa pag-ari Kanako gawas kon pagadanihon siya sa Akong Amahan. Ug ang tanan nga nagaduol Kanako, hatagan Ko siya og Kinabuhing Walay Katapusan. Walay tawo nga makailog kanila gikan sa Akong kamot. Akoa na sila. Sila’y luwas na hangtud sa kahangturan. Anaa na sila Kanako. Walay tawo nga makailog kanila gikan sa kamot sa Akong Amahan, ug Siya Mao ang naghatag kanila nganhi Kanako. Sila’y Akong mga gasa sa gugma.”

²⁰⁰ “Ug ang tanan nga Iyang giila-nang-daan, Iyang gitawag.” Dili Niya pagatawgon ang si kinsa man gawas kon Iyang

giila-nang-daan siya. “Ang tanan nga Iyang gitawag, Iyang gimatarung; ang tanan nga Iyang gimatarung, Iyang gihimaya.” Busa, nakita n’yo, anaa gayud kita sa hingpit nga kapahulayan.

²⁰¹ Karon, kabalo ko nga daghan ang mga legalista dinhi, nubenta’y-nuebe porsyento sa inyo. Apan, ania, kung inyo lamang dawaton Kini ug maamgo n’yo nga wala ako nagasulti-sulti lang og usa ka butang kaninyo.

²⁰² Pero moingon man mo, “Bueno, Igsoong Branham, gadahum gyud ko sa una pa nga kinahanglan kong buhaton ang *ingon-ani* ug kinahanglan kong buhaton ang *ingon-ana*.” Aduna ma’y daku—daku kaayo nga kalahian niini, igsoon, sa kung unsa ang gikinahanglan mong buhaton ug sa kung unsa ang gusto mong buhaton. Naluwas kamo, dili tungod kay adunay usa ka butang nga inyong gibuhat para niini. Naluwas kamo tungod kay giluwas na kamo sa Dios sa wala pa ang pagkatukod sa kalibutan.

²⁰³ Paminaw, paminaw mo, miingon ang Biblia, diha sa Pinadayag, dalhon ko kamo karon gikan sa pinakauna ngadto sa pinakaulahi, miingon ang Biblia, diha sa Pinadayag, nga, sa pag-abot sa mapintas nga mananap, “Gilimbongan niya ang tanan nga anaa sa yuta,” gilimbongan sila sa mapintas nga mananap, “gilimbongan niya ang tanan nga anaa sa yuta, kinsang mga ngalan wala mahisulat sa Basahon sa Kinabuhi nga iya sa Cordero,” Sukad ba niadtong nagsugod ang rebaybal, husto ba kana? Bueno, sukad ba niadtong nagwali ang magwawali og gamhanang wali? Sukad ba niadtong giayo kana nga tawo? “sukad pa sa pagkatukod sa kalibutan.”

²⁰⁴ Asa ba gipatay si Jesus, sa Kalbaryo ba? Dili, sir. Si Jesus gipatay na sa wala pa ang pagkatukod sa kalibutan. “Tan-awa ang Cordero sa Dios, nga gipatay sa wala pa ang pagkatukod sa kalibutan.” Ang Dios, sa sinugdanan, kaniadtong nakita Niya ang sala, nakita na man Niya kung unsa ang mahitabo, og gisulti Niya ang Pulong. Ug mao nga si Jesus gipatay na sa wala pa ang pagkatukod sa kalibutan. Ug ang matag tawo nga naluwas, naluwas na kaniadto pa, sumala sa Biblia, sa dihang gipatay ang Cordero didto pa sa hunahuna sa Dios, sa wala pa ang pagkatukod sa kalibutan. Nalakip na kamo sa kaluwasan kaniadto pa. Busa unsa pa ma’y angay n’yong buhaton para Niini?

²⁰⁵ Ang Dios ang nagbuhat. Dalaygon ang Ngalan sa Ginoo! “Ang Dios ang nagabuhat; dili sa kabubut-on sa tawo o kaniya nga nagapaningkamot, kondili sa Dios nga nagapakita og kalooy.”

Kung si Jesus gipatay na sa wala pa ang pagkatukod sa kalibutan, nan miabot pa og upat ka libo ka tuig adisir kadto nahitabo mismo. Pero sa dihang gisulti kini sa Dios kaniadto, ang matag Pulong sa Dios malig-on gayud. Kini walay-

pagkausab. Kini walay-pagkaguba. Kini walay-pagkapayay. Ug sa dihang gipatay sa Dios ang Anak sa wala pa ang pagkatukod sa kalibutan, ingon niadto ang pagkapatay Kaniya maingon sa kung unsa Siya gipatay didto sa Kalbaryo. Usa kana ka tapos na nga buhat, pag gisulti na sa Dios. Ug hinumdumi, sa dihang gipatay ang Cordero, nalakip na didto ang inyong kaluwasan sa maong paghalad, tungod kay miingon man ang Biblia nga ang inyong ngalan “Nahisulat na sa Basahon sa Kinabuhi nga iya sa Cordero sa wala pa ang pagkatukod sa kalibutan.”

Unsa man diay kana? Kung ingon-ana unsa pa ma’y angay natong buhaton? Tungod kini sa Dios nga maoy nagapakita og kalooy. Ang Dios ang nagtawag kaninyo. Ang Dios ang nagpili kaninyo diha kang Cristo sa wala pa ang pagkatukod sa kalibutan. Miingon si Jesus, “Dili kamo—dili kamo ang nagpili Kanako. Ako ang nagpili kaninyo. Ug naila Ko na kamo, sa wala pa ang pagkatukod sa kalibutan.” Mao kana.

²⁰⁶ Busa, kita n’yo, kana ang nagatangtang sa kahadlok gikan kaninyo. “Oh, makapadayon kaha ko nga makapanghawid? Mahimo ko kana, dalaygon ang Dios, basta padayon lang gyud kong manghawid.” Dili nga kung makapanghawid ba ako, o dili. Ang importante maoy kung makapanghawid ba Siya, o dili. Kini—kini tungod sa Iya mismong gibuhad, dili kini tungod sa kung unsa’y nabuhat ko. Kini tungod sa Iya mismong gibuhad.

Ingon nga sumala sa balaod sa pagtubos. Kini ang diyutay’ng butang nga gusto kong isulti sa dili pa tà magtapos.

²⁰⁷ Unsa kaha kung ang usa ka babayeng kabayo naghimugso og usa ka gamay’ng mula? Ug ang gamay’ng mula nakadungo ang duha ka dalunggan niya. Banlag siya, ug kimpi, og bakang. Ang iyang ikog pinatindog pa gyud. Pagkangil-ad og hitsura nga hayop! Aba, ang si bisan kinsa. . . Kung makahunahuna lang kana nga mula, moingon kini, “Karon, kadali lang. Pag mogawas sila sa balay karong buntaga, sultihan ko kamo, sigurado gyud nga bunalan ako sa ulo. Tungod kay wala man ko nila ginapakaon. Tan-awa ra gud kung unsa kangil-ad ang akong hitsura. Wala na gyud ko’y ni usa ka kahigayonan.”

²⁰⁸ Bueno, tinuod kana. Wala ka na gyud ni usa ka kahigayonan. “Bueno, natawo lagi ako niining kalibutana, pero tan-awa ra gud kung unsa kangil-ad ang akong hitsura. Busa ako—ako—ako—dili na gyud ko magkaaduna og kahigayonan. Wala na ako’y paglaum. Dili na ako makapabilin pa nga buhi.” Kita n’yo?

²⁰⁹ Pero unsa kaha kung ang iyang inahan natudloan gayud sa balaod? Moingon ang inahan, “Anak, husto kana. Dili gayud maayo ang imong porma, ug dili gani ka puedeng mokaon sa pagkaon nga gikan sa yuta. Husto kana. Dili ka angayan. Apan, anak, magkinaunsa man, ikaw ang akong panganay. Ug, kabalo ba ka, gipanganak ka nga may katungod sa pagkapanganay. Ug mao nga dili na ka tan-awon sa sacerdote. Apan, para sa

imong ngalan, adunay usa ka inosente nga cordero nga walay buling, ang gikinahanglang mamatay puli kanimo, aron nga mabuhi ka.”

²¹⁰ Bueno, ang maong gamay'ng mula magsipa-sipa gyud siguro ug maglipay gayud. Wala na'y diperensya kung unsa siya, tungod kay dili man siya ang tan-awon sa maghuhukom, sa sacerdote. Ang cordero na ang tan-awon sa sacerdote. Dili ang mula; kondili ang cordero mismo!

²¹¹ Ug si Cristo usab ang ginatan-aw sa Dios, dili ikaw. Si Cristo. Busa kung walay sala Kaniya, nan unsaon man pagkahimong adunay sala? Unsaon man Niya pagkakaplag og sala, sa dihang patay ka na ug ang imong kinabuhi natago na diha kang Cristo pinaagi sa Dios, og selyado na sa Espiritu Santo? “Sila nga gipanganak na gikan sa Dios wala nagapakasala, kay siya dili man makasala.” Unsaon man niya pagpakasala kon may usa ka hingpit nga halad nga puli kaniya? Dili na ako ang ginatan-aw sa Dios, kondili si Cristo na ang Iyang ginatan-aw, tungod kay anaa man kita kang Cristo.

²¹² Karon, kung gihigugma ko si Cristo, magkinabuhi ako kauban Niya. Wala unta Niya ako gilakip pero nasayod na Siya. Kung giluwes ako sa Dios karon, og nasayran na nga mawala ra diay ko sa Iyaha unom ka semana gikan karon, nan ginasumpaki lang Niya ang Iyang Kaugalingong katuyoan. Husto. Wala diay Siya nasayod sa umalabot kung ingon-ana, kung giluwes Niya ako, unya nasayran na nga mamaingon-ana. Para sa asa man diay nga giluwes Niya ako, unya nasayran na nga mawala ra diay ko sa Iyaha? Wala nagabuhat ang Dios og ingon-anang mga butang, unya bakwion ra Niya human sa duha ka semana, sa pagtuman sa Iyang saad. Kung giluwes ka Niya, nan kana'y sa tanan na nga panahon ug Eternidad.

²¹³ Karon, mahimong emosyonal ka lang, ug moingon, “Oh, bitaw, dalaygon ang Dios! Alleluyah! Nakasulti ako og laing mga pinulongan. Nakasinggit ako. Naangkon ko na. Alleluyah!” Wala kana nagapasabot nga naangkon mo na Kini. Pero, igsoon, pag mokunsad na ang usa ka Butang *dinhi*, ug nakaangkla ka na kang Cristo, kung ingon-ana ang mga bunga sa Espiritu maganunuot na kanimo. Kita nagapamatuod, ang atong espiritu sa Iyang Espiritu, nga kita'y mga anak nga lalaki ug mga anak nga babaye sa Dios. Kung mahimo angkona Kana, mga higala.

²¹⁴ Mapalangan ko man kamo dinhi sa tibuok gabii, sa paghisgot mahitungod niana. Gihigugma ko Kini. Gihigugma ko kamo. Mobalik gyud ako dinhi niining gamay'ng tabernakulo, kanunay, kung lugwayan pa sa Dios ang akong kinabuhi. Gusto kong makita kamo nga nakagamut na ug malig-on na niining Balaang Pagtoo. Dili ko gusto nga makita kamong ginapalid-palid sa matag gamay'ng doktrina, nga nagalabay, nga tay-ogon kamo, ug kung unsa na lang, ug magkaaduna kono og dugo

diha sa ilang mga kamot, o may diyutay'ng niyebe kono diha sa ilang nawong, o mora'g ingon niana, ug makakita kono sila sa kung unsa nga matang sa—sa—sa mga kahayag sa atubangan nila, ug kung unsa nga matang sa—sa pangkinaugalingong butang, maingon sa gisulti sa Biblia, “Nagpaburot sa iyang kasingkasing, ug wala ma'y nakita.” Husto kana. Gusto kong solido gyud kamo sa Pulong. Kung kini'y MAO KINI ANG GINAINGON SA GINOO, nan magpabilin kamo Niini, ikinabuhi n'yo Kini. Mao kana ang Urim Thummim sa niining panahon. Gusto sa Dios nga magkinabuhi kamo pinaagi Niana. Kung wala kana sa Pulong, nan kalimti n'yo kana. Pagkinabuhi kamo alang sa Dios, pagkinabuhi kamo alang kang Cristo.

²¹⁵ Ug kung ang inyong kasingkasing hinay-hinay nang nahisimang, nan kabalo na mo nga aduna gyu'y butang nga nahitabo, pagbalik sa altar ug moingon, “Cristo, bag-oha ang akong . . . ang kalipay sa akong kaluwasan. Ibalik kanako ang gugma nga aduna ako kaniadto. Nagakawala kini, Ginoo. Aduna man gu'y butang nga akong nabuhat. Balaana ako pag-usab, sa pagpadayon. Oh Ginoo, wala gyud ko'y arang mahimo. Dili ko mahimong undangan *kini* ug undangan *kana*. Nagapaabot ako Kanimo nga tangtangan Mo kini kanako, Ginoo, ug gihigugma ko Ikaw.”

²¹⁶ Ug paghawa mo nianang altar, usa na ikaw ka bag-ong tawo diha kang Cristo Jesus. Dayon dili mo na kinahanglan modepende pa sa imong iglesia, modepende sa imong pari, modepende sa imong pastor. Kondili nagadepende ka na lang sa giula nga Dugo ni Ginoong Jesus. “Pinaagi sa grasya kamo naluwas.”

Mag-ampo kita.

²¹⁷ Ginoo, bug-at gyud kini nga mga pagtudlo! Panahon na para sa niining iglesia nga makakaon og karne, ug dili na gatas sa Pulong. Dugay na kami nga gatas lang sa gihapon, nga sa biberon gihapon ginapainom kining masuso. Pero kinahanglan na namong mokaon og magahi nga karne, kay nagakahaduol na ang adlaw. Haduol na ang makuyaw og malisud nga mga panahon, ug daghan pang mga kasamok ang anaa sa unahan. Ug nasayod kami nga dili na gyud moarang-arang pa ang mga panahon. Nasayod kami nga ania na kami sa katapusan. Padayon nga magkadautan ug magkadautan ang mga panahon hangtud nga moabot si Jesus, sumala sa mga Kasulatan.

²¹⁸ Wala kami'y unsa man nga maisaad kanila niining kinabuhia. Apan sa umaabot nga kinabuhi, maisaad namo kanila ang Kinabuhing Walay Katapusan pinaagi sa Imong Pulong, kung motoo lamang sila sa Anak sa Dios ug dawaton Siya ingon nga ilang Halad pasig-uli, ingon nga Mao Ang mipuli kanila, ingon nga Mao Ang mikuha sa ilang mga sala. Itugot kini karon.

²¹⁹ Hinaut nga ang mga dili-magtotoo mamahimong mga magtotoo. Hinaut nga ang mga nagapamahayag dinhi sa iglesia, karong gabhiona, nga nagapamahayag og relihiyon ug nagakinabuhi tungod lang sa iglesia, hinaut nga madawat nila ang usa ka kasinatian kauban sa Dios; nga ang maong gugma mosulod unta sa ilang kasingkasing, nga managdanguyngoy sila tungod sa ilang mga sala, mamatay sa ilang mga kaugalingon, ug matawo pag-usab pinaagi sa Balaang Espiritu, ug mahimong maaghop ug buutan, mahigugmaon, ug puno sa kalipay ug mga panalangin. Ikinabuhi ang ingon-anang kinabuhi, hangtud nga mamahimo silang asin nga ang mga tawo sa palibot nila, pagauhawon nga mamahimong sama nila. Itugot kini, Ginoo, kay amo kining ginapangamuyo sa Iyang Ngalan.

Ug samtang nakaduko ang atong mga ulo.

²²⁰ Nahunahuna ko, karong gabhiona, kung aduna ba kaha'y usa dinhi, ang moingon, "Igsoong Branham, kung pagatimbangon ako diha sa timbangan sa Dios nianang orasa, dili, dili, dili ko gayud matagbo ang gikinahanglan nga imong ginahisgotan karong gabhiona. Mao nga gusto ko unta nga imo akong hinumduman sa pag-ampo, nga bag-ohon ko na ang akong mga pamatasan, ug mosulod ang Dios ug tangtangan kining kabuangan gikan kanako ug himoon akong usa ka tinuod nga Cristohanon"? Mahimo n'yo bang ipataas ang inyong kamot para sa pag-ampo, kung inyong, kung mahimo? Panalanginan ka sa Dios. Panalanginan ka sa Dios. Panalanginan ka sa Dios, dinha sa luyo. Panalanginan ka sa Dios. Panalanginan ka sa Dios, sir. Panalanginan ka sa Dios, igsoong lalaki. Panalanginan ka sa Dios, igsoong babaye.

Holy, Holy, Holy, Lord God of hosts.
Heaven and earth are full of Thee,
Heaven and earth are praising Thee,
O Lord Most High.

Holy . . .

²²¹ Samtang nagapamalandung kamo karon, nagaampo, samtang mabati n'yo nga nasayup gyud kamo, ug gusto ninyong maitul-id, mahimo n'yo bang ipataas ang inyong kamot, nga nagaingon, "Dios, himoa ako kung unsa ang angay kanako"? Panalanginan ka sa Dios, batan-ong babaye. "Dios, himoa ako kung unsa ang angay kanako." Panalanginan ka sa Dios, igsoong lalaki, igsoong babaye, ikaw, ikaw, ikaw *dinhi* dapit.

²²² Naghimalatyon na ang panahon. Nasayod ko nga bug-at gyud, mga higala, pero mas maayo nga masayran n'yo na ang Kamatuoran karon. Karon mag-ampo ta sa mahilumon lang nga paagi.

Holy, Holy, Holy, Lord God . . .

Siya lamang, ang balaan.

... full of Thee,
 Heaven and earth are praising Thee,
 O Lord Most High.

²²³ Langitnong Amahan, samtang nagasalop na ang adlaw niining gabhiona, ang mga robin nagkatapok na sa mga punoan uban ang ilang mga minahal sa kinabuhi. Ang mga langgam nangadto na sa ilang mga salag. Ang mga salampati nanaglupad na nganha sa mga kabli, sa itaas, aron dili sila madisturbo sa mga bitin sa tibuok gabii. Nanagtugdon sila dinha ug nagatingog-tingog sa usa'g usa hangtud nga mahikatulog sila. Misalop na ang adlaw.

²²⁴ Sa umaabot nga adlaw mopaingon na kami nianang taknaa. Mahitabo ang pagsalop sa adlaw. Wala ko mahibalo kung kanus-a, Ginoo. Apan aniyay mga tawo karong gabhiona nga kumbinsido nga nasayup gyud sila, ug gitinguha nila nga mahiadto niana nga dapit, sama ni Lincoln sa dihang naghimalatyon na siya, og miingon, "Ipaatubang ang akong nawong sa nagasalop nga adlaw." Ug misugod siyang mag-ampo, "Amahan namo Nga anaa sa Langit."

²²⁵ Maingon sàb sa gisulti ni Moody kaniadto, "Kamatayon ba kini? Kini mao ang adlaw sa akong pagpurong-purong."

²²⁶ Oh Bugtong Eternal, dawata sila karon mismo, pinaagi sa pagtoo, samtang nanaglingkod sila diha sa ilang mga ginalingkoran. Nanuktok Ka sa ilang kasingkasing, diha sa ginalingkoran nila. Mao kana ang ilang altar. Mao na kini ang oras nga Imo silang dawaton, karon mismo. Miingon man Ka, "Ang moduol Kanako, dili Ko gayud isalikway."

²²⁷ Ug sa umaabot nga adlaw pag mosalop na ang adlaw, motindog na ang asawa o bana tupad sa higdaanan, mihawa na ang mga doktor. Oh Balaan, Balaan, mao kana ang matahum, matam-is nga kahilum, sa dili pa mosalop ang adlaw. Sa dihang motindog kami ug moingon:

Pagsalop sa adlaw ug Panggabii nga Bitoon,
 Ug usa ka tataw nga pagtawag kanako!
 Ug wala unta'y modanguyngoy diha sa
 baybayon
 Pag ako mopaingon na sa dagat.

²²⁸ Oh Dios, itugot kini kanila niining taknaa samtang sila nagahulat, nagahulat alang sa panalangin sa Dios nga mokunsad kanila. Kuhaa ang tanang pagkamainiton sa ulo, ang tanang pagka-kalibutanon, palayo kanila, ug buhati sila og usa ka bag-ong kasingkasing. Gikaingon Mo man, "Kuhaon Ko ang daang kasingkasing, ug igabutang ang usa ka kasingkasing nga unod. Ug igabutang Ko ang Akong Espiritu sa sulod niana nga kasingkasing, ug sila magalakaw sa Akong mga kabalaoran ug magabantay sa Akong mga sugo." Tungod kay, usa kini ka balaod sa gugma, ug dili tungod sa katungdanan. Kondili sa

gugma. Ug gugma ang nagatukmod kanamo para buhaton kini. Usa kini ka katungdanan sa gugma, nga nagatukmod kanamo. Katungdanan namo nga sundon ang gugma. Ug ginaampo ko, Dios, nga ihatag Mo kini sa matag kasingkasing nga nagpataas sa ilang kamot karong gabhiona.

²²⁹ Ug sa mga wala nagpataas sa ilang kamot, karon hinaut nga, pinaagi sa grasya, ipataas na nila ang ilang mga kamot aron dawaton Ka, ug aron mapuno sa Imong Espiritu sa niining maaghop, malulot, hilum, mapaubsanon nga paagi; ug mapuno sa grasya, og mogawas dinhi nga usa ka gibag-o na nga tawo. Malahi na gayud ang pag-awit sa mga langgam, malahi na ang matag usa, human niining orasa, Oh Ginoo nga Labing Hataas.

Holy, Holy, Holy, Lord God of earth.
Heaven and earth are full of Thee,
Heaven and earth are praising Thee,
O Lord Most High.

²³⁰ Karon kamo nga mga nakaduko ang ulo, kamong mga nagpataas sa inyong mga kamot aron mahinumduman sa pag-ampo, nabati ba ninyo nga daw sa nanulti ang Dios kaninyo sa usa ka paagi, dili pinaagi sa emosyon, kondili butang gayud sa kinasuloran ninyo, nabati ba ninyo nga gihatagan kamo sa Dios og Kinabuhing Walay Katapusan? Nabati ba ninyo nga mogawas kamo sa simbahan karong gabhiona nga usa ka lahi na nga tawo? Mahimo n'yo bang ipataas pag-usab ang inyong mga kamot karong gabhiona? Panalanginan ka sa Dios, anak. Panalanginan ka sa Dios, igsoong lalaki. Panalagin ka sa Dios, igsoong babaye. Panalanginan ka sa Dios. Husto kana. "Mogikan ako niini nga simbahan, karong gabhiona, nga usa ka bag-o na nga tawo." Bag-ong natawo nga mga masuso sa Ginghamarian sa Dios.

²³¹ Unsa ma'y nahitabo? Kabalo ko nga naandan na ang pagduol sa altar. Usa kana ka Methodist nga altar, usa ka naandan na sa Methodist, ang buut kong ipasabot. IgleSIang Methodist man ang nagpasugod niini, niadtong mga adlaw ni John Wesley. Walay ingon-ana kaniadto sa panahon sa Biblia. "Ang tanan nga nagtoo gidugang sa Iglesia." Mahimo kamong motoo sa bisan asa man kamo, anaa man sa umahan, anaa sa dalan, bisan asa. Bisan asa pa, walay kalahian, basta dawaton ninyo si Cristo ingon nga inyong personal nga Manluluwas. Usa kini ka buhat sa Espiritu Santo nga nagasulod sa inyong kasingkasing. Sa dihang mitoo kamo Kaniya, og gidawat Siya, miagi na kamo gikan sa kamatayon ngadto sa Kinabuhi, ug nahimo kamong mga bag-ong binuhat na diha kang Cristo Jesus.

Pass me not, O gentle Saviour,

Karon tindog na mo.

. . . my humble cry;
 While on others Thou are calling,
 Do not pass me.


²³² Karon gusto ko nga ang batan-ong lalaki ug ang gining, nga sa tan-aw ko asawa niya, nga nagpataas og kamot, gusto ko nga ipataas n'yo pag-usab ang inyong kamot dinha sa luyo; iho, nga nagasul-ob og pula nga amerikana, ug ang gining, nga midawat kang Cristo ingon nga ilang personal nga Manluluwas. Ang batan-ong lalaki nga nagalingkod dinha sa wheel chair, gidawat niya si Cristo ingon nga iyang Manluluwas, nabati niya nga giluwat na siya sa Dios. Ug ang uban sàb dinha sa luyo nga nagpataas sa inyong mga kamot, ipataas n'yo pag-usab ang inyong mga kamot aron makita sa mga tawo sa palibot, aron makapag-fellowship sila kaninyo.

²³³ Lamanoha n'yo sila, ang tanan sa palibot, nga nagatindog duol nila. Moingon, “Panalanginan ka sa Dios. Amo kamong ginaabi-abi sa Ginharian sa Dios, igsoon kong lalaki, igsoon kong babaye.” Pagpakig-fellowship, mao kana’y ginatinguha nato. Panalanginan sa Dios . . . Lamanoha n'yo kining batan-ong lalaki dinhi sa wheel chair. Ang Ginoo magauban kaniya. Husto. Ginadawat namo kamo sa pagpakig-fellowship sa Balaang Espiritu.

²³⁴ Kung wala pa kamo nabautismohan, ug gusto ninyo nga mabautismohan, duol ra mo ug isulti sa pastor ang bahin niini. Ang bautismohan dinhi aduna ma’y tubig, karong gabhiona, kung gitinguha n'yo nga magpabautismo. Andam na ang tanan. (Nabautismohan na ba ka, kaniadto?) Bueno nakaandam na ang bautismohan, kung aduna ma’y si bisan kinsa nga gustong magpabautismo. Ang Biblia miingon, “Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong sala, ug madawat ninyo ang gasa nga Espiritu Santo. Kay ang saad alang kaninyo ug sa inyong mga anak, ug sa tanang atua sa halayo, bisan ang kapid-an nga pagatawgon sa atong Ginoong Dios.”

²³⁵ Gihigugma ba ninyo Siya? Ipataas ang inyong mga kamot. Oh, dili ba Siya kahibulongan? Nalipay ba kamo sa niining Basahon sa Mga Hebreohanon? Gusto ba ninyo Kini? [Nagaingon ang kongregasyon, “Amen.”—Ed.] Oo. Maayo. Karon, pagpanulid Kini. Oh, mabagison Kini ug diretsahan Kini, pero gusto gyud nato ang ingon-ana. Sa ingon-anang paagi nato gustong mabatonan Kini. Ayaw natong mabatonan Kini sa ubang paagi.

²³⁶ Karon, nagatoo ba kamo nga si Pablo adunay awtoridad sa pagwali Niini sa ingon nianang paagi? Ang ingon ni Pablo, “Kung ang usa ka Manulonda moabot ug magawali og lain nga maayong balita, ipatunglo siya.” Husto ba? Busa gihigugma nato ang Dios sa tibuok natong kasingkasing.

²³⁷ Karon hangyoon ko ang pastor nga moduol dinhi sa makadiyut, ang atong pinakabililhon nga igsoon, si Igsoong Neville, ug aduna siya'y isulti sa inyo. Ug bueno, kon itugot sa Ginoo, magkita-kita tà sa Miyerkules sa gabii, ug mangandam pud tà para sa pag-adto kang Igsoong Graham Snelling para sa usa ka gabii nga panagtigum sa kongregasyon. Ug pagkahuman ipadayon nato dinhi ang pagwali bahin sa ika-7 ug ika-8 nga kapitulo, sa niining moabot nga Miyerkules sa gabii. Igsoong Neville. 

MGA HEBREOHANON, KAPITULO SIETE ¹ CEB57-0915E

(Hebrews, Chapter Seven ¹)

SERYE SA LIBRO SA MGA HEBREOHANON

Kining Mensahe ni Igsoong William Marrion Branham, una giwali sa Ingles niadtong Dominggo sa gabii, Septyembre 15, 1957, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org